

舊唐書

二五

蘇平私藏

PDG

唐書列傳卷第七十九

劉

昉

等修

韓滉

子臯弟洄

張延賞

子引靖子文規

宗

韓滉字太冲太子少師休之子也少貞介好學以蔭解褐左威衛
騎曹參軍出爲同官主簿至德初青齊節度鄧景山辟爲判官授
監察御史兼北海郡司馬以道路阻絕因避地山南採訪使李承
昭奏充判官授通州長史彭王府諮議參軍鄧景山移鎮淮南又
表爲賓佐未行除殿中侍御史追赴京師先是滉兄法知制誥草
王璵拜官之詞不加虛美璵頗銜之及其秉政諸使奏滉兄弟者
必以冗官授之璵免相羣議稱其屈累遷至祠部考功吏部三員
外郎滉公絜強直明於吏道判南曹凡五年詳究簿書無遺纖隱
大曆中改吏部郎中給事中時盜殺富平令韋當縣吏捕獲賊黨
而名隸北軍監軍魚朝恩以有武林請詔原其罪滉密疏駁奏賊
遂伏辜遷尚書右丞五年知兵部選六年改戶部侍郎判度支自

至德乾元已後所在軍興賦稅無度帑藏給納多務因循滉既常
司計清勤檢轄不容姦妄下吏及四方行綱過犯者必痛繩之又
屬大曆五年已後蕃戎罕侵連歲豐稔故滉能儲積穀帛帑藏稍
實然苛剋頗甚覆治按牘勾剝深文人多咨怨大曆十二年秋霖
雨害稼京兆尹黎幹奏畿縣損田滉執云幹奏不實乃命御史巡
覆迴奏諸縣凡損三萬一千一百九十五頃時渭南令劉藻曲附滉
言所部無損戶部分巡御史趙計復檢行奏與藻合代宗覽奏以
爲水旱咸均不宜渭南獨免申命御史朱敖再檢渭南損田三千
餘頃上謂敖曰縣令職在字人不損猶宜稱損損而不問豈有恤
隱之意耶卿之此行可謂稱職下有司訶鞫藻計皆伏罪藻貶萬
州南浦貳外尉計貶豐州貳外司戶滉弄權樹黨皆此類也俄改
太常卿議未息又出爲晉州刺史數月拜蘇州刺史浙江東西都
團練觀察使尋加檢校禮部尚書兼御史大夫潤州刺史鎮海軍
節度使滉旣移鎮安輯百姓均其租稅未及踰年境內稱理及建

中年冬涇師之亂德宗出幸河汴騷然混訓練士卒鍛礪戈甲稱
爲精勁李希烈旣陷汴州混乃擇其銳卒令裨將李長榮王栖曜
與宣武軍節度劉玄佐犄角討襲解寧陵之圍復宋汴之路混功
居多然自關中多難混即於所部閉關築築石頭五城自京口至
玉山禁馬牛出境造樓船戰艦三十餘艘以舟師五千人由海門
揚威武至申浦而還毀撤上元縣佛寺道觀四十餘所修塢起建
業抵京峴樓雉相屬以佛殿材於石頭城繕置館第數十時混以
國家多難恐有永嘉渡江之事以爲備預以迎鑒駕亦申儆自守
也城中穿深井十丈近百所下與江平俾偏將丘濬督其役濬酷
虐士卒日役千人朝令夕辦去城數十里內先賢丘墓多令毀廢
明年正月追李長榮等戍鄆還以其所親吏盧復爲宣州刺史採
石軍使增營壘教習長兵以佛寺銅鍾鑄弩牙兵器陳少遊時鎮
揚州以甲士三千人臨江大閱混亦以兵三千人臨金山與少遊相
應樓船於江中以金銀繒綵互相聘賚而自德宗出居及歸京師

軍用既繁道路又阻關中飢饉加之災蝗江南兩浙轉輸粟帛
府無虛月朝廷賴焉興元元年就加檢校吏部尚書數月又加檢
校右僕射貞元元年七月拜檢校左僕射同平章事使並如故二
年春特封晉國公其年十一月來朝京師時右丞元琇判度支以
關輔旱儉請運江淮租米以給京師上以琬浙江東節度素著威
名加江淮轉運使欲令專督運務琇以琬性剛愎難與集事乃條
奏琬督運江南米至揚子凡一十八里揚子南北皆元琇主之琬深
怒於琇琇以京師錢重貨輕切疾之乃於江東監院收獲見錢四
十餘萬貫令轉送入關琬不許乃誣奏云運千錢至京師費錢至
萬於國有害請罷之上以問琇琇奏曰一千之重約與一斗米均自
江南水路至京一千之所運費三百耳豈至萬乎上然之遣中使
齎手詔令運錢琬堅執以爲不可其年十二月加琬度支諸道轉
運鹽鐵等使遂寔宿怒累誣奏琇貶雷州司戶其責旣重舉朝以
爲非罪多竊議者尚書左丞董晉謂宰相劉沔齊映曰元左丞忽

有貶責未知罪名用刑一濫誰不危懼假有權臣騁志相公何不
奏請三司詳斷之去年關輔用兵時方蝗旱琇摠國計夙夜憂勤
以贍給師旅不增一賦軍國皆濟斯可謂之勞臣也今見播逐恐
失人心人心一搖則有聞鷄起舞者矣竊謂相公痛惜之滋映但
引過而已給事袁高又抗疏申理之滉誣以朋黨寢而不行時兩
河罷兵中土寧又滉上言吐蕃盜有河湟為日已久大曆已前中
國多難所以肆其侵軼臣聞其近歲已來兵衆寢弱西迫大食之
強北病迴紇之衆東有南詔之防計其分鎮之外戰兵在河隴五
六萬而已國家第令三數良將長驅十萬衆於源鄯洮渭並修堅
城各置二萬人足當守禦之要臣請以當道所貯蓄財賦為饋運
之資以充三年之費然後營田積粟且耕且戰收復河隴二十餘
州可翹足而待也上甚納其言滉之入朝也路由汴州厚結劉玄
佐將薦其可任邊事玄佐納其賂因許之及來覲上訪問焉初頗
稟命及滉以疾歸第玄佐意怠遂辭邊任盛陳犬戎未衰不可

輕進滉貞元三年二月以疾薨遂寢其事年六十五上震悼久之廢朝三日贈太傅賻布帛米粟有差滉宰相子幼有美名其所結交皆時之雋彥非公直者不與之親密性持節儉志在奉公衣裘茵祗十年一易居處陋薄纔蔽風雨弟涸常於里宅增修廊宇滉自江南至即命撤去之曰先公容焉吾輩奉之常恐失墜所有摧圯葺之則已豈敢改作以傷儉德自居重位愈清儉嫉惡彌縫闕漏知無不爲家人資產未嘗在意入仕之初以至卿相凡四十年相繼乘馬五疋皆及弊帷尤工書兼善丹青以繪事非急務自晦其能未嘗傳之好易象及春秋著春秋通例及天事序議各一卷然以前輩早達稍薄後進晚歲至京師丞郎卿佐接之頗倨衆不能平其在浙右也政令明察末年傷於嚴急巡內婺州傍縣有犯其令者誅及隣伍死者數十百人又俾推覆官分察境內情涉疑似必寘極法誅殺殘忍一判即勦數十人且無虛日雖令行禁止而寃濫相尋議者以滉統制一方頗著勦績自幼立名貞廉晚途政甚

苛際身未達則飾情以進得其志則本質遂彰子群臯群官至考
功貢外郎臯字仲文夙負令名而器質重厚有大臣之度由雲陽
尉擢賢良科拜右拾遺轉左補闕累遷起居郎考功貢外郎俄丁
父艱德宗遣中人就第慰問仍宣令論譔況之事業臯號泣承命
立草數千言德宗嘉之及免喪執政者擬考功郎中御筆加知制
誥遷中書舍人御史中丞尚書右丞兵部侍郎皆稱職改京兆尹
奏鄭鋒爲倉曹專掌錢穀鋒苛刻剥下爲事人皆咨怨又勸臯搜
索府中雜錢折采百姓粟麥等三十萬石進奉以圖恩寵臯納其
計尋奏鋒爲興平縣令及貞元十四年春夏大旱粟麥枯槁畿內
百姓累經臯陳訴以府中倉庫虛竭憂迫惶惑不敢實奏會唐
安公主女出適右庶子李愬內官中使於愬家往來百姓遮道投狀
內官繼以事上聞德宗下詔曰京邑爲四方之則長吏受親人之寄
實繫邦本以分朕憂苟非其才是素於理正議大夫守京兆尹賜
紫金魚袋韓臯比踐清貫頗聞謹恪委之尹正異効公忠乃者邦

畿之間粟麥不稔朕念茲黎庶方議蠲除自宜悉心以副勤恤
奏報失實處理無方致令閭井不安囂然上訴及今覆視皆涉虛
詞壅蔽頗深罔惑斯甚宜加懲誡以勗守官可撫州司馬員外置
同正員馳驛發遣鋒亦尋出爲汀州司馬臯無幾移杭州刺史復
拜尚書右丞臯侍前輩頗以簡倨自處順宗時王叔文黨盛臯嫉
之謂人曰吾不能事新貴臯從弟畢幸於叔文以告之因出爲鄂
州刺史岳鄂蘄沔等州觀察使入爲東都留守元和八年六月加
檢校吏部尚書兼許州刺史充忠武軍節度等使以陳許二州水
潦之後賜臯綾絹布葛十萬端足以助軍資宴賞所理以簡儉
稱入爲吏部尚書兼太子少傅判太常卿事元和十一年三月皇
太后王氏崩以臯充大明宮使十五年閏正月充憲宗山陵禮儀
使三月穆宗以師保之舊加檢校右僕射十二月以銓司考科目人
失實與刑部侍郎知選事李建勗一月俸料長慶元年正月正拜
尚書右僕射二年四月轉左僕射赴尚書省上事命中使宣賜酒

饌及宰臣百寮送上皆如近式其年以本官東都留守行及戲源
驛暴卒年七十九贈太子太保太和元年謚曰貞臯生知音律嘗
觀彈琴至止息歎曰妙哉藝生之爲是曲也其當晉魏之際乎其
音主商商爲秋聲秋也者天將搖落肅殺其歲之晏乎又晉乘金
運商金聲此所以知魏之季而晉將代也慢其商絃與宮同音是
臣奪君之義也所以知司馬氏之將篡也司馬懿受魏明帝顧託
後嗣返有篡奪之心自誅曹爽逆節彌露王陵都督揚州謀立荆
王彪母丘儉文欽諸葛誕前後相繼爲揚州都督咸有匡復魏室
之謀皆爲懿父子所殺叔夜以揚州故廣陵之地彼四人者皆魏
室文武大臣咸敗散於廣陵始也止息者晉雖暴興終止息於此
也其哀憤躁感惜痛迫脅之言盡在於是矣永嘉之亂其應乎叔
夜撰此將貽後代之知音者且避晉魏之禍所以託之神鬼也
洎以蔭緒受任劉晏判鹽鐵度支辟爲屬吏累官至諫議大夫知
制誥與元載善載誅以累貶邵州司戶同正員建中元年二月復

諫議大夫先以劉晏兼領度支晏既罷黜今天下錢穀各歸尚書省本司廢職罷事久無綱紀徒收其名而莫綜其任國用出入未有所統故轉迴戶部侍郎判度支迴上言江淮錢監歲鑄錢四五千貫輸于京師度工用轉送之費每貫計錢二千是本倍利也今商州有紅崖冶出銅益多又有洛源監久廢不理請增工鑿山以取銅興洛源故監置十鑪鑄之歲計出錢七萬二千貫度工用轉送之費貫計錢九百則利得本矣其江淮七監請皆罷之復以天下銅鐵之冶是曰山澤之利當歸於王者非諸侯方岳所有今諸道節度都團練使皆占之非宜也請摠隸鹽鐵使皆從之迴與楊炎善炎得罪常不自安無何兄子臯抗疏理炎罪德宗意迴令為之尋貶蜀州刺史興元元年三月入為兵部侍郎六月為京兆尹七月加御史大夫貞元二年正月刑部侍郎劉太真黨於宰相盧杞得罪以迴代太真為刑部侍郎尋復兵部侍郎貞元七年十一月為國子祭酒張延賞中書令是是貞之子幼孤名寶符開元末玄宗召見賜名延

賞取賞延於世之義特授左司禦率府兵曹參軍博涉經史達於政事侍中韓國公苗晉卿見而奇之以女妻焉肅宗在鳳翔擢拜監察御史賜緋魚袋轉殿中侍御史關內節度使王思禮請爲從事思禮領河東又爲太原少尹兼行軍司馬北都副留守代宗幸陝除給事中轉御史中丞中書舍人大曆二年拜河南尹充諸道營田副使河洛久當兵衝間并丘墟延賞勤身率下政尚簡約跡導河渠修築宮廟數年間詠庸歸附邦畿復完詔書褒美焉時罷河南西山山南副元帥以其兵鎮東都延賞權知東都留守以領之理行第一入朝拜御史大夫初上封人李少良潛以元載陰事聞載黨知之奏少良狂妄下御史臺訊鞫欲有所屬延賞不承其意尋出爲揚州刺史淮南節度觀察等使屬歲旱歉人有亡去他堵者吏或拘之延賞曰夫食人之所恃而生也此居而坐斃逼彼而可生得存吾人又何恨於彼也乃具舟楫而遣之俾吏修其廬室已其逋債而歸者增於其舊邊江之瓜洲舟航湊會而懸屬江南延

賞奏請以江爲界人甚爲便尋以母憂去職終制授檢校禮部尚書江陵尹兼御史大夫荆南節度觀察使數年改檢校兵部尚書成都尹劍南西川節度觀察使依前兼御史大夫尋就加吏部尚書建中四年十一月部將西山兵馬使張朮以兵入成都爲亂延賞奔漢州鹿頭戍將叱干遂等討之其月斬朮及同惡者復歸成都先是兵革屢擾自天寶末楊國忠用事南蠻三蜀疲弊屬車駕遷幸其後郭英乂誣崔寧之室遂縱崔寧楊琳交亂及崔寧得志復極侈靡故蜀土殘弊蕩然無制度延賞薄賦約事動遵法度僅至庶富焉建中末駕在山南延賞貢奉供億頗竭忠力焉駕在梁州倚劍南蜀川爲根本貞元元年以宰相劉從一有疾詔徵延賞爲中書侍郎同中書門下平章事與鳳翔節度使李晟不協晟表論延賞過惡德宗重違晟意延賞至興元改授左僕射初大曆末吐蕃寇劍南李晟領神策軍戍之及旋師以成都官妓高氏歸延賞聞而大怒即使將吏令追還焉晟頗銜之形于詞色三年正

月晟入朝詔晟與延賞釋憾德宗注意於延賞將用之會浙西觀察使韓滉來朝嘗有德於晟因會譙說晟使釋憾遂同飲極歡且請晟表薦爲相晟然之於是復加同中書門下平章事及延賞當國用事晟請子婢其女固情好焉延賞拒而不許晟謂人曰武人性使若釋舊惡於杯酒之間終歡可解文士難犯雖修睦於外而蓄怒于內今不許婚媾未忘也得無懼焉無幾延賞果謀罷晟兵權初吐蕃尚結贊興兵入隴州抵鳳翔無所虜掠且曰召我來何不持牛酒勞軍徐乃引去持是以閒晟晟令牙將王泌選銳兵三千設伏汧陽大敗吐蕃結贊僅免自是數遣使乞和晟朝於京師奏曰戎狄無信不可許宰相韓滉又扶晟議請調軍食以繼之上意將帥生事邀功會滉卒延賞揣上意遂行其志奏令給事中鄭雲達代之上不許且曰晟有社稷之功今自舉代己者於是始用邢君牙焉拜晟太尉兼中書令奉朝請而已是年五月吐蕃果背約以劫渾瑊及冊晟太尉故事臨軒冊拜三公中書令讀冊侍中

奉禮如闕即以宰相攝之延賞欲輕其禮始令兵部尚書崔漢衡攝中書令讀冊時議非之延賞奏議請省官員曰為政之本必先命官舊制官員繁而且費州縣殘破職此之由臣在荆南劔南所管州縣闕官員者少不下十數年吏部未嘗補授但令一官假攝公事亦理以此言之員可減無疑也請減官員收其祿俸資幕職戰士俾劉玄佐復河湟軍用不乏矣上然之初韓滉入朝至汴州厚結劉玄佐將薦其可委邊任玄佐亦欲自効初稟命及滉卒玄佐以疾辭上遣中官勞問卧以受命延賞知不可用奏用李抱真抱真亦辭不行時抱真判官陳曇奏事京師延賞俾曇勸抱真竟拒絕之蓋以延賞挾怨罷李晟兵柄由是武臣不附自建議減員之後物議不平延賞懼量留其官下詔曰諸州府停減及所留官並合釐務其中有先考滿及充職掌遇停減或恐公務有關宜委長吏於合停官中取考淺人清白幹舉者留填闕官差攝訖聞奏但取才堪不限資序如當州官少任以鄰州官充其州縣諸色部

送準舊例以當州官及本土寄客有資產幹了者差遣及減負人衆道路怨歎曰聞於上侍中馬燧奏減負太甚恐不可行太子少保韋倫及常叅官等各抗疏以減負招怨並請復之浙西觀察使白志貞亦以跡論時延賞疾甚在私第李泌初爲相採於羣情由是官員悉復貞元三年七月薨年六十一廢朝三日贈太保賻禮加等諡曰成肅子弘靖字元理雅厚信直少以門蔭授河南府叅軍調補藍田尉東都留守杜亞辟爲從事奏改監察御史裏行轉殿中侍御史內供奉留守將令狐運逐賊出郊其日有劫轉運綰於道者亞以運豪家子意其爲之乃令判官穆負及弘靖同鞫其事負與弘靖皆以運職在牙門必不爲盜堅請不按亞不聽遂以獄聞仍斥負及弘靖出幕府有詔令三司使維治之後果於河南界得賊無何德陽公主下嫁治第將侵弘靖家廟弘靖拜表陳情具述祖考之德德宗尉撫之不令毀廟又獻賦美二京之制德宗嘉其文擢授監察御史轉殿中侍御史禮部員外郎遷兵部郎中知

制誥中書舍人知東都選事拜工部侍郎轉戶部侍郎陝州觀察
河中節度使拜刑部尚書同中書門下平章事吳少陽死其子元
濟擅主留務憲宗怒欲下詔誅之弘靖請先命弔贈使待其不恭
然後加兵憲宗從其議尋加中書侍郎平章事盜殺宰相武元衡
京師索賊未得時王承宗邸中有鎮卒張晏輩數人行止無狀人
多意之詔錄付御史臺御史陳中師按之皆附致其罪如京中所
說弘靖疑其不直驟於上前言之憲宗不聽竟殺張晏輩及田弘
正入軍按簿書亦有殺元衡者但事曖昧互有所說卒未得其實
又殺張晏後憲宗欲遂伐承宗弘靖以為戎事並興鮮有濟者不
若併攻元濟待淮西平然後悉師河朔憲宗業已北討不為之止
然亦重違其言弘靖知終不聽用遂自陳乞罷政事俄檢校吏部
尚書同中書門下平章事充太原節度使行未及鎮果下詔誅承
宗弘靖以驟諫不行宜用自効大閱軍實請躬討承宗詔許出軍
不許自往俄而魏博澤潞悉為承宗所敗有詔賞其前言弘靖即

閒道發使懇喻承宗承宗因亦款附旋徵拜吏部尚書遷檢校右
僕射宣武軍節度使時韓弘入覲之後也弘靖用政寬緩代弘之
理俄以劉總累求歸闕且請弘靖代己制加檢校司空平章事充
幽州盧龍等軍節度使弘靖之入幽州也薊人無老幼男女皆夾
道而觀焉河朔軍帥冒寒暑多與士卒同無張甚晏安輿之別弘靖
久富貴又不知風土入燕之時肩輿於三軍之中薊人頗駭之弘靖
以祿山思明之亂始自幽州欲於事初盡革其俗乃發祿山墓毀
其棺柩人尤失望從事有韋雍張宗厚數輩復輕肆嗜酒常夜飲
醉歸燭火滿街前後呵叱薊人所不習之事又雍等詬責吏卒多以
反虜名之謂軍士曰今天下無事汝輩挽得兩石力弓不如識一丁
字軍中以意氣自負深恨之劉總歸朝以錢一百萬貫賜軍士弘
靖留二十萬貫充軍府雜用薊人不勝其憤遂相率以叛囚弘靖
於薊門館執韋雍張宗厚輩數人皆殺之續有張徹者自遠使迴
軍人以其無過不欲加害將引置館中徹不知其心遂索弘靖所

在大罵軍人亦爲亂兵所殺明日吏卒稍稍自悔悉詣館請弘靖
爲帥願改心事之凡三請弘靖卒不對軍人乃相謂曰相公無言
是不捨吾曹必矣軍中豈可一日無帥遂取朱泚爲兵馬留後朝
廷旣除泚子克融爲幽州節度使乃貶弘靖爲撫州刺史未幾遷
太子賓客少保少師長慶四年六月卒年六十五元和初王承宗阻
兵劉摠父濟備陳征討之術請身先之及出軍累拔城邑摠旣繼
父願述先志且欲盡更河朔舊風長慶初累表求入朝兼請分割
所理之地然後歸朝其意欲以幽涿營州一道請弘靖理之瀛州
爲一道盧士玫理之平薊媯檀爲一道請薛平理之仍籍軍中宿
將盡薦於闕下因望朝廷昇獎使幽薊之人皆有希美爵祿之意
及疏上穆宗且欲速得范陽宰臣崔植杜元穎又不爲遠大經略
但欲重弘靖所授而省其使局唯瀛莫兩州許置觀察使其他郡
縣悉命弘靖統之時總所校俱在京師旅舍中久而不問朱克融
輩僅至假衣丐食日詣中書求官不勝其困及除弘靖命悉還本

軍克勲輩雖得復歸皆深懷觖望其後因爲叛亂初總以平薊嬀擅請薛平於分列衣之中尤爲上策而朝廷不能行之竟致後患人到于今惜之子文規景初嗣慶次宗文規歷拾遺補闕吏部員外郎開成三年十一月右丞韋溫彈劾文規長慶中父弘靖陷在幽州文規徘徊京師不尋赴難不宜塵汙南宮乃出爲安州刺史累遷右散騎常侍兼御史中丞桂管都防禦觀察使景初歷職使府官止殿中侍御史嗣慶位終河南少尹次宗最有文學稽古履行開成中爲起居舍人文宗復故事每入閣左右史執筆立于螭頭之下宰相奏事得以備錄宰臣既退上召左右史更質證所奏是非故開成政事詳於史氏次宗尤稱奉職改禮部員外郎以兄文規爲韋溫不放入省出官次宗堅辭省秩改國子博士兼史館修撰出爲舒州刺史卒文規子彥遠大中初由左補闕爲尚書祠部員外郎景初子天保嗣慶子彥修次宗子曼容延賞東都舊地在思順里亭館之麗甲於都城子孫五代無所加工時號三相張

氏云

史臣曰君民足則國富將相和則國安反是道焉非得仁者泚殺
元琇奏瑞鹽運幹運之能非貞純之士刻下罔上以爲己功幸逢
多事之朝例在姑息之地幸而獲免餘無可稱延賞以私害公罷
李晟兵柄使武臣不陳其力矣惡直醜正擠柳渾相位致賢者不
進其才矣象恭僞功皆凶之跡也雖以蔭繼世以才進身蹈非
道者實小人哉延賞歷典名藩皆稱善政及登大位乃彰飾情臯
迭處大寮徒稱舊德引靖輕傲邊事欺滅軍資泐附元載楊炎繼
及累貶俱非守正中立者也書云世祿之家鮮克由禮不其是歟
贊曰韓泚刻下延賞害公臯泐繼世引靖興戎

唐書列傳卷第七十九

左從政郎紹興府錄事參軍徐

俊卿

校勘

唐書列傳卷第十

劉

昉

等修

王與

道士李國植
梁鎮奏疏附

李泌

子繁願況附

崔造

關播

李元平附

王與少習禮學博求祠祭儀注以干時開元末玄宗方尊道術靡
神不宗與抗疏引古今祀典請置春壇祀青帝於國東郊玄宗甚
然之因遷太常博士侍御史元祠祭使與專以祀事希倖每行祠
禱或焚紙錢襮祈福祐近於巫覡由是過承恩遇肅宗即位累遷
太常卿以祠禱每多錫賚乾元三年七月兼蒲州刺史元蒲同絳
等州節度使中書令崔圓罷相乃以與爲中書侍郎同中書門下
平章事人物時望素不爲衆所稱及當樞務聲問頓減與又奏置
太一神壇於南郊之東請上躬行祀事肅宗嘗不豫太卜云祟在
山川與乃遣女巫分行天下祈祭名山大川巫皆盛服乘傳而行
上令中使監之因緣爲姦所至干託長吏以邀賂遺一巫盛年而

美以惡少年數十自隨尤爲蠹弊或徒宿於黃州傳舍刺史左震晨至驛門扃鐃不可啓震破鎖而入曳女巫階下斬之所從惡少年皆斃閱其贓賂數十萬震籍以上聞仍請賦錢代貧民租稅其中使發遣歸京肅宗不能詰肅宗親謁九宮神恩勲於祠禱皆與所啓也歲餘罷知政事爲刑部尚書上元二年兼揚州長史御史大夫元淮南節度使肅宗南郊禮畢以與使持節都督越州諸軍事越州刺史元浙江東道節度觀察處置使本官兼御史大夫祠祭使如故入爲太子少保轉少師大曆三年六月卒與以祭祀妖妄致位將相時以左道進者往往有之廣德二年八月道士李國禎以道術見因奏白雲土仙系宜修崇靈跡請於昭應縣南三十里山頂置天華上官露臺大地窠父三皇道君太古天皇中古伏羲媧皇等祠堂并置掃灑宮戶一百戶又於縣之東義扶谷故湫置龍堂並許之時歲飢荒人甚不安昭應縣令梁鎮上表曰臣聞國以人爲本害其本則北國神以人爲主虐其主則非神故昔之

聖王所以極陳理道明著祀典將愛其人而慎用其財力敬其神而虔恭於祠祭故神享其明德而降之福人受其大賴而盡其力然後神人以和而國家可保也一昨蝨賊作孽水旱爲災雖王畿皆遍而臣縣最苦此則神之不能禦大災明矣又何力於陛下而得列祀典哉且以殘敝之餘當凶荒之歲丁壯素出家入仕羸老方飛藟輓粟令但供億王事已不堪命更奔走鬼道何以聊生臣又聞天地之神尊之極者掃地可祭精意可饗陛下亦何必廢先王之典崇俗巫之說走南畝之客殺東隣之牛而後冀非妄之福陛下雖欲爲人祈福福未至而人已困矣其不可一也陛下不視昔者有道之君至德之后曷不卑宮室惡飲食恭己以遂萬物之性哉陛下今違神享育之心竭人疲困之力如是又何從而致其福哉此又不可二也又陛下宗廟之敬極矣尚無一月三祭之禮今此獨爲則宗廟之靈將等以親疎校以厚薄陛下又何以言哉此又不可三也又大地婆父祀典無文言其不經義無可取若陛下特

與大地建祖宗之廟必上天貽向背之責陛下又何以爲詞哉此又不可四也夫漱者龍之所居也龍得水則神無水則螻蟻之匹也故知水存則龍在水竭則龍亡此愚智之所同知矣今漱竭已久龍安所存陛下又崇飾祠宇豐潔薦奠爲去龍之穴破生人之產人且怨矣神何歛哉此又不可五也其道君三皇五帝則兩京及所都之處皆建宮觀祠廟時設齋醮饗祀國有彝典官有常禮蓋無關失何勞神役靈此又不可六也臣稽先王之典禮觀前聖之軌躅休咎豐凶災祥禍福必生帝王五事不在山川百神此又不可七也臣伏察此弊頗知其由蓋以道士李國禎等動衆則得人興工則獲利祭祀則受胙主執則弄權是以鼓動禁中熒惑天聽踰越險阻負荷姦盛以日繫年無時而息曾不謂神功力空止竭人膏血以使人神胥怨人孽並生罔上害人左道亂政原情定罪非殺而何臣昨受命之時親承聖旨務存安緝許逐權宜誠願沉鄴縣之巫安流弊之俗其所興兩祠土木之功丹青之役三

六之祭灑掃之戶謹明宣旨並以權宜傳訖人吏百姓等知陛下以從善爲心嫉惡爲務蠲除不急剗革煩苛皆喧呼於庭抃躍於路所徵糧糗無不樂輸臣伏以國禎等並文結中貴校蠹成性臣雖忘身許國不懼讒構終恐賄及豪右復爲奸惡其國禎等見據狀推勘如獲贓狀伏望許臣徵收便充當縣郵館本用其湫旣竭不可更置祠堂又不當爲大地建立祖廟臣並請停其三皇道君天皇伏羲女媧等旣先各有宮廟望請並於本所依禮齋祭上從之

李泌字長源其先遼東襄平人西魏太保八柱國司徒何弼之六代孫今居京兆吳房令承休之子少聰敏博涉經史精究易象善屬文尤工於詩以王佐自負張九齡韋虛心張廷珪皆器重之泌操尚不羈恥隨常格仕進天寶中自嵩山上書論當世務玄宗召見令待詔翰林仍東宮供奉楊國忠忌其才辯奏泌嘗爲感遇詩諷刺時政詔於蘄春郡安置乃潛遁名山以習隱自適天寶末祿

山構難肅宗北巡至靈武即位遣使訪召會泌自嵩穎間冒難奔
赴行在至彭原郡謁見陳古今成敗之機甚稱旨延致卧內動皆
顧問泌稱山人固辭官秩特以散官寵之解褐拜銀青光祿大夫
俾掌樞務至於四方文狀將相遷除皆與泌參議權逾宰相仍判
元帥廣平王軍司馬事肅宗每謂曰卿當上皇天寶中爲朕師友
下判廣平王行軍朕父子三人資卿道義其見重如此尋爲中書
令崔圓倖臣李輔國害其能將有不利於泌懼乞遊衡山優詔
許之給以三品祿俸遂隱衡岳絕粒栖神數年代宗即位召爲翰
林學士頗承恩遇及元載輔政惡其異己因江南道觀察都團練
使魏少遊奏求參佐稱必有才拜檢校秘書少監充江南西道判
官幸其出也尋改爲檢校郎中依前判官元載誅乃馳傳入謁上
見悅之又爲宰相常衮所忌出爲楚州刺史及謝恩具陳戀闕上
素重之留京數月會澧州刺史闕衮盛陳泌理行以荆南凋瘵遂
輟泌理之詔曰荆南都會吳在澧陽俾人歸厚惟賢是牧以泌文

可以化成風俗政可以全活惇嫠爰命頒條期乎共理無薄淮陽之守勉思渤海之功可檢校御史中丞充澧朗破團練使重其禮而遣之無幾改杭州刺史以理稱興元初徵赴行在遷左散騎常侍貞元元年除陝州長史充陝虢都防禦觀察使二年六月泌奏虢州盧氏山右近出瑟瑟請充獻禁人開採詔曰瑟瑟之寶中土所無今產於近甸實爲靈貺朕不飾器玩不尚珍竒常思返朴之風用明躬儉之節其出瑟瑟之處任百姓求採不宜禁止就加泌檢校禮部尚書時陳許戈邊卒三千自京西逃歸至州境泌潛師險隘左右攻擊盡誅之尋拜中書侍郎平章事集賢崇文館學士修國史初張延賞大減官負人情咨怨泌請復之以從人欲因是奏罷兼試額內占闕等官加百官俸料隨閑劇加置手力課上從之人人以爲便而竇叅旁奏遂改易使同品之內月俸多少累等泌又奏請罷拾遺補闕上雖不從亦不授人故諫司唯韓臯歸登而已泌仍命收其署食錢今登等寓食於中書舍人故時戲云韓諫

議雖分左右歸拾遺莫辨存亡如是者三年至貞元五年以前東都防禦判官殿中侍御史內供奉韋綬爲左補闕監御史梁肅右補闕既復置人心忻然順宗在春宮妃蕭氏母郾國公主交通外人上疑其有他連坐貶黜者數人皇儲亦危必百端奏說上意方解必頗有讜直之風而談神仙詭道或云嘗與赤松子王喬安期羨門遊處故爲代所輕雖詭道求容不爲時君所重德宗初即位尤惡巫祝怪誕之士初肅宗重陰陽祠祝之說用妖人王瑱爲宰相或命巫媼乘駟行郡縣以爲厭勝凡有所興造功役動牽禁忌而黎幹用左道位至尹京嘗內集衆工編刺珠繡爲御衣旣成而焚之以爲禳禳且無虛月德宗在中宮頗知其事即位之後罷集僧於內道場除巫祝之祀有司言宣政內廊壞請修繕而太上云孟冬爲魁岡不利穿築請上他月帝曰春秋之義啓塞從時何魁岡之有卒命修之又代宗山陵靈駕發引上號送于承天門見輶輅不當道稍指午未間問其故有司對曰陛下本命在午故不

敢當道上號泣曰安有枉靈駕而謀身利卒命直午而行及建中
末寇戎內梗桑道茂有城奉天之說上稍以時日禁忌爲意而雅
聞泌長於鬼道故自外徵還以至大用時論不以爲恆及在相位
隨時俯仰無足可稱復引顧況輩輕薄之派動爲朝士戲侮頗貽
譏誚年六十八薨贈太子太傅贈禮有加泌放曠敏辯好大言自
出入中禁累爲權倖忌嫉恒由智免終以言論縱橫上悟聖主以
躋相位有文集二十卷子繁少聰警有才名無行義泌爲相嘗引
薦夏縣處士北平陽城爲諫議大夫城道直既遇知己深德之及
泌歿戶部尚書裴延齡巧佞奉上德宗信任竊弄威權舉朝側目
城中正之士尤忿嫉之一日盡跡其過惡欲密論奏以繁故人子
爲可親信遂示其跡草兼請繁繕寫繁既寫悉能記之其夕乃
徑詣延齡具述其事延齡聞之即時請對盡以城章中欲論事件
二先自解及城跡入德宗以爲安不之省泌與右補闕翰林學士
梁肅友善嘗命繁持所著文請肅潤色繁亦自有學術肅待之

甚厚因許師事日熟其門及肅卒繁亂其配士君子無不歎駭積
年委棄後起爲太常博士太常卿權德輿奏斥之除河南府士曹
掾以其謇悟異常泌之故人爲宰相左右援拯後得累居郡守而
力學不倦罷隨州刺史歸京師久不承恩韋處厚入相厚待之寶
曆二年六月敬宗降誕日御三殿特詔兵部侍郎丁公著太常少
卿陸亘與繁等三人抗浮圖道士講論九月除大理少卿復加弘
文館學士時諫官御史章䟽相繼宰相臣不得已出爲亳州刺史州
境嘗有群賊剽人廬舍劫取貨財累政擒捕不獲繁潛設機謀悉
知賊之巢穴出兵盡加誅斬時議責繁以不先啓聞廉使涉於擅
興之罪朝廷遣監察御史舒元輿按問元輿素與繁有隙復以初
官銳於生事乃盡反其獄辭以爲繁濫殺無辜狀奏勅於京北府
賜死時人寃之其後元輿被禍人以爲有報應焉初泌派放江南
與柳渾顧況爲人外之交吟詠自適而渾先達故泌復得入官
於朝

顧況者蘇州人能爲歌詩性詼諧雖王公之貴與之交者必戲侮之然以嘲諷能文人多狎之柳渾輔政以校書郎徵復遇李泌繼入自謂已知秉樞要當得達官久之方遷著作郎況心不樂求歸於吳而班列群官咸有侮玩之目皆惡嫉之及泌卒不哭而有調笑之言爲憲司所劾貶饒州司戶有文集二十卷其贈柳宜城辭句率多戲劇文體皆此類也子非熊登進士第累佐使府亦有詩名于時

崔造字玄宰博陵安平人少涉學永泰中與韓會盧東美張正則爲友皆僑居上元好談經濟之略嘗以王佐自許時人號爲四蔓浙西觀察使李栖筠引爲賓僚累至左司員外郎與劉晏善及晏遭楊炎庾準誣奏伏誅造累貶信州長史朱泚之逆造爲建州刺史聞難作馳檄隣州請齊舉義兵遂調發所部得二千人德宗聞而嘉之及收京師詔徵造至藍田以舅源休明逆伏誅上疏請罪不敢即赴闕上以爲知禮優詔慰勉拜吏部郎中給事中貞

元二年正月與中書舍人齊映各守本官同平章事時京畿兵亂之後仍歲蝗旱府無儲積德宗以造敢言爲能立事故不次登用造久從事江外嫉錢穀諸使罔上之弊乃奏天下兩稅錢物委本道觀察使本州刺史選官典部送上都諸道水陸運使及度支巡院江淮轉運使等並停其度支鹽鐵委尚書省本司判其尚書省六職令宰臣分判乃以戶部侍郎元琇判諸道鹽鐵榷酒等事戶部侍郎吉中孚判度支及諸道兩稅事宰臣齊映判兵部丞旨及雜事宰臣李勉判刑部宰臣劉滋判吏部禮部造判戶部工部又以歲饑浙江東西道入運米每年七十五萬石今更令兩稅折納米一百萬石委兩浙節度使韓滉運送一百萬石至東渭橋其淮南豪壽言米洪潭屯米委淮南節度使杜亞運送二十萬石至東渭橋諸道有鹽鐵處依舊置巡院勾當河陰見在米及諸道先付度支巡院般運在路錢物委度支依前勾當其未離本道者分付觀察使發遣仍委中書門下年終類例諸道課最聞奏造與元琇

素厚罷使之後以鹽鐵之任委之而韓滉方司轉運朝廷仰給其漕發滉以司務久行不可遽改德宗復以滉為江淮轉運使餘如造所條奏元琇以滉性剛難制乃復奏江淮轉運其江南米自江至揚子凡十八里請滉主之揚子已北琇主之滉聞之怒拊撫琇鹽鐵司事論奏德宗不獲已罷琇判使轉尚書右丞其年秋初江淮漕米大至京師德宗嘉其功以滉專領度支諸道鹽鐵轉運等使造所條奏皆改物議亦以造所奏雖舉舊典然凶荒之歲難為集事乃罷造知政事守太子右庶子貶琇雷州司戶造初奏太銳及琇改官憂懼成疾數月不能視事明年九月卒年五十一

關播字務元衛州汲人也天寶末舉進士鄧景山為淮南節度使辟為從事累授衛佐評事遷右補闕善言物理尤精釋氏之學大曆中神策軍使王駕鶴妻關氏以播與同宗深遇之元載惡其交往出為河南府兵曹攝職數縣皆有政能陳少遊領浙東淮南又辟為判官歷檢校金部員外攝滁州刺史李靈曜阻兵跋扈於梁

汴少遊自揔兵鎮汴上所在盜賊蜂起播調閱州兵令其守備又
爲政清淨簡惠既無盜賊人甚安之楊綰常袞知政事薦播爲都
官負外郎德宗登極湖南山洞中有王國良者聚衆爲盜令播往
宣撫之臨行召對於別殿上問政理之要播奏云爲政之本須求
有道賢人乃可得理上謂播云朕下詔求賢良當躬親閱試亦遣
使臣黜陟廣加搜訪聞薦擢其能者用之異以傳理播奏曰下詔
求賢黜陟舉薦唯得求名文詞之士安有有道賢人肯隨牒舉選
乎上悅其言謂播曰卿且使去迴日當與卿論政事播又奏曰臣
今奉詔招撫國良不受命臣請便宜恩命語隣境速出兵翦除上
曰卿言深合朕意使迴改兵部員外遷河中少尹建中初張鎰爲
河中少尹鎰尋入相二年七月遷播給事中舊例諸司甲庫皆是
胥吏掌知爲弊頗久播始建議並以士人知之至今稱當轉刑部
侍郎奉迎皇太后副使盧杞以播柔緩異其易制驟稱薦之尋遷
吏部侍郎轉刑部尚書知刪定奏上元中詔擇古今名將十人於

武成王廟配享如文宣王廟之儀播以太公古稱大賢今其下稱
亞聖於義不安又孔子十哲皆是當時弟子今所擇名將年代不
同於義既乖於事又失臣請刪去名將配享之儀及十哲之稱從
之建中三年十月拜銀青光祿大夫中書侍郎同中書門下平章
事集賢殿崇文館大學士修國史時政事決在盧杞播但斂衽取
容而已乏於知人之鑒好大言虛誕者播必悅而親信之有李元
平陶公達張孫劉承誠皆言談詭妄誇大可立功名亦有微材薄
藝播累奏云元平等皆可將相也請閱試用之上以爲然以元平
爲補闕會淮西節度李希烈叛亂上以汝州要鎮令選擇刺史播
薦元平爲汝州刺史尋加檢校吏部郎中汝州別駕知州事元平
至州旬日爲希烈所擒汝州陷賊中外哂之由是公達等未剋任
用播與盧杞等從駕幸奉天旣而盧杞白志貞等並貶黜播尚知
政事中外囂然以爲不可遂罷相改刑部尚書大臣韋倫等匠於
朝日宰相不能謀猷翊贊以至今日而尚爲尚書可痛心也貞元

四年迴紇請和親以咸安公主出降可汗今播以本官加檢校右僕射兼御史大夫持節充送咸安公主及冊可汗奉使往來皆清儉謹慎蕃人悅之使迴遷兵部尚書固辭疾請罷官改太子少師致仕播致仕之後減去僮僕車騎閉關守靜不縈外事士君子重之貞元十三年正月卒時年七十九廢朝一日贈太子太保

李元平者宗室子始爲湖南觀察使蕭復判官試大理評事性疎傲敢大言好論兵天下賢士大夫無可其意者以是人多銜怒關播竒重之許以將帥時希烈反叛朝廷以汝州與賊接壤刺史韋光裔懦弱不任職播乃盛稱元平特召見超左補闕不數日擢爲檢校吏部郎中兼汝州別駕知州事旣至部募工徒繕理郭郭希烈乃使勇士應募執役板築凡入數百人元平不之覺希烈遣僞將李克誠以數百騎突至其城先應募執役者應於內縛元平馳去旣見希烈遺下汚地希烈見其無鬚眇小戲謂克誠曰使汝取李元平何得將元平兒來因嫚罵曰盲宰相使汝當我何待我淺

耶僞署爲御史中丞播聞元平得用仍欺於人曰李生功業濟矣
言必能覆希烈而建功也居無何希烈用爲宰相或告其有二者
乃斷一指以自誓希烈旣死或有人言在賊中微有謀慮貸死流
於珍州會赦得歸剡中浙東觀察使皇甫政表聞其到以發上怒
復流賀州而死

史臣曰蒸嘗杓祀前王制以奉先怪力亂神宜聖鄙而不語凡云
左道固有舊章瑱假於鬼神乃至將相旣處代天之位爰滋亂政
之源國禎妖人疑衆妄恢其祀典梁鎮正士抗疏方悟其上心必
見可進而知難退足爲高率智辯之士居相位而談鬼道乃見狂
妄浮薄之蹤王制云執左道以亂政殺寧無畏乎繁之醜行棄於
當時竟陷非辜諒由素履造爲臣得禮莅事非能播居位取容舉
人敗事皆非國器咸歷台司失人者亡國其危矣

贊曰瑒必造播俱非相材國禎左道梁生直哉

唐書列傳卷第八十

左從政郎紹興府錄事參軍徐俊卿校勘

唐書列傳第八十一

劉

响

李勉

李臯

子象古 道古

李勉字玄卿鄭王元懿曾孫也父擇言爲漢襄相岐四州刺史安
德郡公所歷皆以嚴幹聞在漢州張嘉貞爲益州長史判都督事
性簡貴待管内刺史禮隔而引擇言同榻坐談政理時人榮之勉
幼勤經史長而沉雅清峻宗於虛立以近屬陪位累授開封尉時
昇平日久且汴州水陸所湊邑居龐雜號爲難理勉與聯尉盧成
軌等並有擒奸擿伏之名至德初從至靈武拜監察御史屬朝廷
右武勳臣恃寵多不知禮大將管崇嗣於行在朝堂背闕而坐言
笑自若勉劾之拘於有司肅宗特原之數曰吾有李勉始知朝廷
尊也遷司膳貲外郎時關東獻俘百餘詔並處斬四有仰天歎者
勉過問之對曰某被脅制守官非逆者勉乃哀之上言曰元惡未
殄遭點汚者半天下皆欲澡心歸化若盡殺之是驅天下以資兇

逆也肅宗遽令奔騎宥釋由是歸化日至克復西京累歷清要四遷至河南少尹累爲河東節度王思禮朔方河東都統李國貞行軍司馬尋遷梁州都督山南西道觀察使勉以故吏前密縣尉王晔勤幹俾攝南鄭令俄有詔處死勉問其故乃爲權倖所誣勉詢將吏曰上方藉牧宰爲人父母豈以譖言而殺不辜乎即停詔拘晔飛表上聞晔遂獲宥而勉竟爲執政所非追入爲大理少卿謁見面陳王晔無罪政事條舉盡力吏也肅宗嘉其守正乃除太常少卿王晔後以推擇拜大理評事龍門令終有能名時稱知人肅宗將大用勉會李輔國寵任意欲勉降禮於己勉不爲之屈竟爲所抑出歷汾州虢州刺史改京北尹檢校右庶子兼御史中丞都畿觀察使尋兼河南尹明年罷尹以中丞歸西臺又除江西觀察使賊帥陳莊連陷江西州縣偏將呂太一武日昇相繼背叛勉與諸道力戰悉攻平之部人有父病以蠱道爲木偶人署勉名位瘞于其隴或以告曰爲父攘災亦可矜也捨之大曆二年來朝拜

京兆尹兼御史大夫政尚簡肅官官魚朝恩爲觀軍容使仍知國
子監事恃寵含威天憲在舌前尹黎幹寫心候事動必求媚每朝
恩入監傾府人吏具數百人之餼以待之及勉莅職旬月朝恩入
監府吏先期有請勉曰軍容使判國子監事勉候太學軍容宜厚
具主禮勉忝京尹軍容儻惠顧府廷豈敢不具蔬饌朝恩聞而銜
之因不復至太學勉亦尋受代四年除廣州刺史兼嶺南節度觀
察使番禺賊帥馮崇道桂州叛將朱濟時等阻洞爲亂前後累歲
陷沒十餘州勉至遣將李觀與容州刺史王翊併力招討悉斬之
五嶺平前後西域舶泛海至者歲纔四五勉性絮廉舶來都不檢
閱故末年至者四十餘在官累年器用車服無增飾及代歸至石
門停舟悉搜家人所貯南貨犀象諸物投之江中耆老以爲可繼
前朝宋璟盧象李朝隱之徒人吏詣闕請立碑代宗許之十年拜
工部尚書及滑亳永平軍節度令狐彰卒遺表舉勉自代因除之
在鎮八年以舊德清重不嚴而理東諸侯雖暴驚者亦宗弼之十

一年汴宋留後田神玉卒詔加勉沛州刺史汴宋節度使未行汴
州將李靈曜阻兵北結田承嗣承嗣使姪悅將銳兵戍之詔勉與
李忠臣馬燧等攻討大破之悅僅以身免靈曜北走勉驕將杜如
江擒之以獻代宗褒賞甚厚旣而李忠臣代鎮汴州而勉仍舊鎮
忠臣遇下貪虐明年爲麾下所逐詔復加勉汴宋節度使移理汴
州餘並如故德宗嗣位加檢校吏部尚書尋加平章事建中元年
檢校左僕射充河南汴宋滑亳河陽等道都統餘如故四年李
希烈反以他盜爲名悉衆來寇汴州勉城守累月救援莫至謂其
將曰希烈凶逆殘酷若與較力必多殺無辜吾不忍也遂潛師潰
圍南奔宋州詔以司徒平章事徵旣至朝廷素服請罪優詔復其
位勉引過備位而已無何盧杞自新州負外司馬除澧州刺史給
事中袁高以杞邪佞蠹政貶未塞責停詔執表遂授澧州別駕他
日上謂勉曰衆人皆言盧杞姦邪朕何不知卿知其狀乎對曰天
下皆知其姦邪獨陛下不知所以爲姦邪也時人多其正直然自

是見疎累表辭位遂罷知政事加太子太保貞元四年卒年七十
二上頗愍悼之冊贈太傅賻物有差喪葬官給勉坦率素淡好古
尚奇清廉簡易爲宗臣之表善鼓琴好屬詩妙知音律能自制
琴又有巧思及在相位向二十年祿俸皆遺親黨身沒而無私積
其在大官禮賢下士終始盡心以名士李巡張叅爲判官卒於幕
三歲之內每遇宴飲必設虛位於筵次陳膳執醑辭色悽惻論者
美之或曰勉失守梁城亦可貶也議者曰不然當賊烈之始亂其
慄悍陰禍兇焰不可當天方厚其毒而降之罰況勉應變非長援
軍莫至又其時關輔已假擾矣人心已動搖矣以文吏之才當虎狼
之隊其全師奔宋非量力之恥也與其坐受喪敗不猶愈乎

李臯字子蘭曹王明立孫嗣王戢之子少補左司禦率府兵曹參
軍天寶十一載嗣封授都水使者三遷至秘書少監皆同正多智
數善因事以自便奉太妃鄭氏以孝聞上元初京師旱米斛直數
千死者甚多臯度俸不足養亟請外官不允乃故抵微法貶溫州

長史無幾攝行州事歲儉州有官粟數十萬斛臯欲行賑救掾吏叩頭乞候上言臯曰夫人日不再食當死安暇稟命若殺我一身活數千人命利莫大焉於是開倉盡散之以擅貸之罪飛章自劾天子聞而嘉之荅以優詔就加少府監臯行縣見一媼垂白而泣哀而問之對曰李氏之婦有二子鈞鶚官遊二十年不歸貧無以自給時鈞爲殿中侍御史鶚爲京兆府法曹俱以文藝登科名重於時臯曰入則孝出則悌行有餘力然可以學文若二子者豈可備於列位由是舉奏並除名勿齒改處州別駕行州事以良政聞劾至京未召見因上書言理道拜衡州刺史坐小法貶潮州刺史時楊炎謫官道州知臯事直及爲相復拜衡州初臯爲御史覆評懼貽太妃責憂出則素服入則公服言兒如平常太妃責不知及爲潮州詭詞謂遷至是復位方泣以白且言非疾不敢有聞建中元年遷湖南觀察使前使辛京杲貪殘有將王國良鎮邵州武岡縣豪富京杲以死罪加之國良危懼因人所苦遂散財聚衆據縣

以叛諸道同討聯歲不能下皐授命曰乃曰驅疲眊誅反側非所以奉聖朝事遣使遺國良書曰觀將軍非敢大逆蓋遭讒嫉救誤死而已將軍遇我何不速降我與將軍同爲平京杲所構我已蒙聖朝昭雪使我何心持刃殺將軍耶將軍以爲不然我以陣術破將軍陣以攻法屠將軍城非將軍所度也國良捧書且憂且喜遣使請降亦未必使皐即日赴縣受降中道有候騎馳告曰國良軍中有變言降是詐也皐曰非爾輩所知遂留麾下兵單騎假稱使者徑入國良壘中國良召使者入皐遂大叫軍中曰有人識曹王否只我是國良何不速降一軍愕眙不敢動適有識者走至傳呼曰是國良匍匐叩頭請罪皐執手約爲兄弟盡焚攻守之備散倉庫給兵士令復農桑有詔赦國良罪賜名惟新建中二年丁母艱奉喪至江陵會梁崇義反乃授起復左衛大將軍復還湖南尋加散騎常侍李希烈反遷江西道節度使洪州刺史兼御史大夫至州集將吏而令曰嘗有功未申者別爲行有策謀及器能堪佐軍

者別爲行有裨將伊慎李伯潛劉旻皆自占臯察其詞氣驗其有功悉補大將擢王鏐委之中軍以馬彞許孟容爲賓佐繕甲兵具戰艦將軍二萬餘初伊慎將江西兵從李希烈平襄州及反懼臯任之乃陰遣遺之鎧甲又詐爲慎書往復置遺于境上聞即遣中使斬慎臯表請捨令自効會與賊夾江爲軍中使又至臯乃勉令以功自贖賜之以所乘馬及器甲令將鋒而先臯率軍繼之貴其有功果大破賊斬首數百級慎方得免罪賊樹堡柵於蔡山臯度峻險不可攻乃聲言西取蘄州理戰艦分兵傍南涯與舟師沂江而上賊以老弱守柵引軍循江隨戰艦南北與臯兵相去直蔡山三百餘里臯令步兵登舟順流東下不日拔蔡山賊還救間一日方至大破之因進拔蘄州降其將李良又取黃州斬首千餘兵益振舒王爲元帥加臯前軍兵馬使德宗居奉天淮南節度陳少遊強取鹽鐵錢其使包佶以財幣沂江次于蘄口時希烈已屠汴州又遣驍將杜少誠將步騎萬餘來寇蘄黃將絕江道臯遣伊慎將

七千衆禦之遇于永安戎慎列三柵相去纔四里列鼓角中柵少
誠至分兵圍之部隊未嚴聲鼓而三柵齊出奮擊不爲行陣賊亂
少誠敗走斬首萬級封尸爲京觀以功加銀青光祿大夫進封五
百戶上至梁州進獻繼至臯以上蒙塵于外不敢居城府乃於
四塞山上游大洲屯軍從近縣爲軍市商貨畢至加工部尚書駕
還京師又遣伊慎王鐸將兵圍安州州城阻涇水爲固攻之累日不
下希烈遣甥劉戎虛將步騎八千來援臯命李伯潛分師迎擊於
應山獲戎虛及大將二裨將二十斬首千餘面縛戎虛等之城下
乃使人說之賊曰得大將及賓佐一二人爲信當降臯乃使王鐸
馬彝繩城而入城中大呼乃出降希烈又遣兵援隨州臯令伊慎
擊於厲鄉大破之復平靜白鴈等關希烈懼乃戢兵貞元初拜江
陵尹荆南節度等使江漢倚臯爲固未幾李思登以隨州降凡下
州四縣十七大小十餘陣未嘗敗衄惟西旣平請護喪柩東都上
遣中使弔贈父右僕射母曹國太妃葬畢來朝詔還鎮出東都以

拜墓觀者榮之先江陵東北有廢田旁漢古隄二處每夏則盜臯始命塞之廣田五千頃畝得一鍾規江南廢洲爲廬舍架江爲二橋流人自占二千餘戶自荆至樂鄉凡二百里旅舍鄉聚凡十數大者皆數百家楚俗佻薄不穿井飲陂澤臯始命合錢開井以便人初平希烈吳少誠殺陳仙奇上以襄鄧要阨三年除襄州刺史山南東道節度等使割汝隋隸焉練兵積糧市迴鶻馬益騎兵嘗大畋以教士少誠憚之性勤儉知人疾苦設監司能衆聽下持將吏短長賞罰必信所至常平物貴則出賣之給將吏廩俸豪家不得擅其利常運心巧思爲戰艦挾二輪蹈之翔風鼓疾若挂帆席所造省易而久固又造欹器進入內中每遺人物常自秤量署之官匹帛皆印之絕吏之私初扶風馬彞未知名臯始辟之卒以正直稱漢陽王張柬之有林園在州西公府多假之游宴臯將買之彞斂枉而言曰張漢陽有中興功今遺業當百代保之王縱欲之奈何令其子孫自贍焉臯謝曰主吏失詞爲足下羞微足下安得

聞此言以改過遷善知人任下爲己任故賓從將佐多至大官貞
元八年三月暴卒于位年六十廢朝三日贈右僕射賻弔有差謚
曰成子象古道古復古象古自衡州刺史爲安南都護元和十四年
爲楊清所殺妻子支黨無噍類焉楊清者代爲南方酋豪屬象古
貪縱人心不附又惡清之強自驩州刺史召爲牙門將營營不使
無何邕管黃家賊叛詔象古發兵數道共討之象古命清領兵三
千赴焉清與其子志烈及所親杜士交潛謀迴戈夜襲安南數日
城陷象古故及於害朝廷命唐州刺史桂仲武爲都護且招諭之
赦清以爲瓊州刺史仲武至境清不納復約東部署刑戮僭虐人
無聊生仲武使人諭其酋豪數月間歸附繼至約兵七千餘人收
其城斬清及其子志貞籍沒其家志烈與士交敗保于長州之鑿
溪尋以所部兵來降道古登進士第遷司門員外郎便佞巧宦早
昇朝籍常以酒肴棊博游公卿門角賭之際每僞爲不勝而厚償
之故當時有虛名而嗜利者悉與之狎歷利隨唐睦四州刺史由

黔中觀察爲鄂岳兩蘄安黃團練觀察使時元和十一年也初以柳公綽在鎮無功議將代之裴度言道古嗣曹王臯之子臯嘗以江漢兵遏希烈之亂威惠至今在人復用其子必能繼美憲宗然之故有此授及赴鎮倍道而行以數騎徑入安州城時公綽殊未意道古至惶駭而出家財多爲所奪十二年道古攻申州克其羅城乃進圍逼其中城城中守卒夜帥婦人登城而呼懸門竊發分出其衆道古之衆驚亂爲虜所殺初李聽守安州未嘗退衄及道古至誣奏聽移去之乃自帥兵出穆陵士卒驕惰賜給多闕其度支供軍錢道古半以奉權倖半以沒己人皆怨怒不肯力戰賊亦易道古以羸兵抵之故道古前後再攻破申州外城而不能拔至李愬入蔡州乃降元和十三年入爲宗正卿道古在鄂州日以貪暴聞懼終得罪乃薦山人柳泌以媚於上後又爲左金吾衛將軍憲宗季年頗信方士銳於服食詔天下搜訪奇士宰相皇甫鏘方諛媚固寵道士言柳泌有道術鍊得而進之待詔翰林憲宗服餌過

當暴成狂躁之疾以至棄代穆宗在東宮扼腕於其事及居喪皆
竄逐誅之鑄既貶責授道古循州司馬終以服丹藥歐血而卒
史臣曰李勉李臯稟性端莊處身廉潔臨民蒞事動有美聲可謂
宗臣之英也若夫治軍旅禦寇戎謀必臧戰必勝則又勉不及臯
遠矣道古便佞奸以事君何父子之不相類也

贊曰我宗之英曰臯與勉才雖不同道豈相遠

唐書列傳卷第八十一

左從政郎紹興府錄事叅軍徐俊卿校勘

唐書列傳第八十二

劉

昉

修

李抱玉

李抱眞

王虔休

盧從史

李芄

李澄

族弟元

系

李抱玉武德功臣安興貴之裔代居河西善養名馬爲時所稱
從兄弟或徙居京華習文儒與士人通婚者稍深士風抱玉少長
西州好騎射常從軍幕沉毅有謀小心忠謹乾元初太尉李光弼
引爲偏裨屢建勲績由是知名二年自特進右羽林軍大將軍知
軍事遷鴻臚卿負外置同正員持節鄭州諸軍事兼鄭州刺史攝
御史中丞鄭陳穎亳四州節度時史思明陷洛陽光弼守河陽賊
兵鋒方盛光弼謂抱玉曰將軍能爲我守南城二日乎抱玉曰過
期若何光弼曰過期而救不至任棄城也賊帥周摯領安太清徐
黃玉等先次南城將陷之抱玉乃給之曰吾糧盡明日當降賊衆
大喜斂軍以俟之抱玉因得繕宇設備明日堅壁請戰賊怒欺給

急攻之抱玉出奇兵表裏夾攻殺傷甚衆摯軍退光弼自將于中
讎城摯捨南城攻中讎不勝乃整軍將攻北城光弼以兵出戰大
敗之固河陽復懷州皆功居第一遷澤州刺史兼御史中丞代宗
即位擢爲澤潞節度使潞州大都督府長史兼御史大夫加領陳
鄭二州遷兵部尚書抱玉上言臣貫屬涼州本姓安氏以祿山構
禍恥與同姓去至德二年五月蒙恩賜姓李氏今請割晉屬京北
府長安縣許之因是舉宗並賜國姓廣德元年冬吐蕃寇京師乘
輿幸陝諸軍潰卒及村閭亡命相聚爲盜京城南面子午等五谷
群盜頗害居人朝廷遣薛景仙領兵爲五谷使招討連月不捷乃
詔抱玉兼鳳翔節度使討之抱玉探知賊帥行止之處先分屯諸
谷乃設奇潛使輕銳數百南自洋州入攻之賊帥高玉方與諸偷
會遽爲銳卒數十人掩擒之因大搜獲偷黨悉斬之餘黨不討自
潰旬日內五谷平以功遷司空餘並如故時吐蕃再歲犯境上以
岐陽國之西門寄在抱玉恩寵無比遷同中書門下平章事又兼

山南西道節度使河西隴右山南西道副元帥判梁州事連統三道節制兼領鳳翔緄舉三大府秩處三公抱玉以任位崇重抗疏懇讓司空及山南西道節度判梁州事乞退授兵部尚書上嘉其謙讓許之抱玉凡鎮鳳翔十餘年雖無破虜之功而禁暴安人頗爲當時所稱大曆十二年卒上甚悼之輟朝三日贈太保

李抱眞抱玉從父弟也抱玉爲澤潞節度使甚器抱眞任以軍事累授汾州別駕當是時僕固懷恩反于汾州抱眞陷焉乃脫身歸京師代宗以懷恩情迴紇所將朔方兵又勁憂甚召見抱眞問狀因奏曰郭子儀領朔方之衆人多思之懷恩欺其衆曰子儀爲朝恩所殺詐而用之今復子儀之位可不戰而克其後懷恩子瑒爲其下所殺懷恩奔遁多如抱眞衆因是遷殿中少監居頃之爲陳鄭澤潞節度留後抱眞因中謝言曰臣雖無可取當今百姓勞逸繫在牧守願得一郡以自試上許之改授澤州刺史兼爲澤潞節度副使居二年轉懷州刺史復爲懷澤潞觀察使留後凡八年抱

王卒抱眞仍領留後抱眞密揣山東當有變上黨且當兵衝是時
乘戰餘之地土墾賦重人益困無以養軍士籍戶丁男三選其一有
材力者免其租徭給弓矢令之曰農之隙則分曹角射歲終吾當
會試及期按簿而徵之都試以示賞罰復命之如初比三年則皆
善射抱眞曰軍可用矣於是舉部內鄉得成卒二萬前既不廩費
府庫益實乃繕甲兵爲戰具遂雄視山東是時天下稱昭義軍步
兵冠諸軍無幾復代李承昭爲昭義軍及礪邢節度觀察留後加
散騎常侍德宗即位拜檢校工部尚書兼潞州長史昭義軍節度
支度營田澤潞礪邢觀察使建中三年田悅以魏博反乃悉兵圍
邢州及臨洛益急詔河東節度使馬燧及神策兵救之抱眞與燧
敗悅兵於雙岡斬悅將楊朝光又擊破悅于臨洛遂解臨洛及邢
州之圍以功加檢校兵部尚書復與燧大破悅於洹水悅以數百
騎走歸魏州復與燧圍魏州又敗悅於城下以功加檢校右僕射
時悅窘蹙朱滔王武俊皆反聯兵救悅抱眞與燧等退次魏縣上

幸奉天中使告問至諸將皆仰天慟哭李懷光席卷奔命馬燧李
芑各引兵歸鎮朱泚既行宮闕時李希烈陷大梁李納亦反鄆州
無何上幸梁州李懷光又竊據河中抱真獨於擾攘傾潰之中以
山東三州外抗群賊內輯軍士群賊深憚之興元初遷檢校左僕
射平章事時朱滔悉幽薊軍借兵迴紇擁衆五萬南向以應泚攻
圍貝州初群賊附於希烈希烈僭僞有臣屬群賊意群心稍離
上自奉天下罪己之詔悉赦群賊抱真乃遣門客賈林以大義說
武俊合從擊朱滔武俊許之時兩軍尚相疑抱真乃以數騎徑入
武俊營其將去也賓客皆止之抱真遣軍司馬盧玄卿勒軍部分
曰僕今日此舉繫天下安危僕死不還領軍事以聽朝命亦唯子
奮勵士馬東向雪僕之恥亦唯子言訖而去武俊設備甚嚴抱真
曰朱泚希烈僭竊大位朱滔攻圍貝州此輩皆欲陵駕吾屬足下
旣不能自振數賊之上捨九葉天子而北面臣反虜乎乃者聖上
奉天下罪己之詔可謂禹湯之主也因言及播越持武俊哭涕泗

交下武俊亦哭感動左右因退卧武俊帳中甘寢久之武俊感其
不疑待之益恭指心仰天曰此身已許公死敵矣遂與結爲兄弟
而別約明日合戰遂擊破朱滔于經城以功加檢校司空實封五
百戶貞元初朝于京師居頃之還鎮抱真沉斷多智計嘗欲招致
天下賢雋問人之善必令持貨幣數千里邀致之至與語無可採
者漸退之時天下無事乃大起臺榭穿池沼以自娛晚節又好方
士以翼長生有孫季長者爲抱真鍊金丹給抱真曰服之當昇僊
遂署爲賓僚數謂叅佐曰此丹秦皇漢武皆不能得唯我遇之他
年朝上清不復偶公輩矣復夢駕鶴冲天寤而刻木鶴衣道士衣
以習乘之凡服丹二萬九腹堅不食將死不知人者數日矣道士牛
洞立以猪肪穀漆下之殆盡病少間季長復曰垂上僊何自棄也
益服三千九頃之卒初抱真久疾好機祥或令厭勝爲巫祝所惑
請降官爵以禳除之是年凡七上章諱司空復爲檢校左僕射貞
元十年卒時年六十二廢朝三日贈太保賻以布帛米粟有差抱

眞薨之日其子殿中侍御史絨匿喪不發營田副使盧會昌令抱
眞從甥元仲經潛與絨謀其明日將吏會集仲經詐爲抱眞令曰
吾疾甚不能莅職今令絨掌軍事諸軍善佐之節度副使李說及
諸將吏俛首皆曰諾須臾絨盛服而出衆皆拜之絨乃悉府藏頒
賞軍士盧會昌仍詐爲抱眞表請以職事付絨翌日又令諸將連
奏請絨領軍上已聞抱眞卒乃遣中使第五守進馳傳觀變且令
以軍事屬於大將王延貴守進至潞州絨詐言抱眞疾病請見明
日如此者凡三日絨乃出遣中使左右皆陳兵甚嚴備中使謂絨
曰朝廷已知相公薨歿今以兵務屬延貴侍御宜歸發喪行服也
絨愕然出謂諸將曰有詔不許絨掌事諸公意如何將吏莫有對
者絨懼而退遽以使印及管鑰歸監軍是日乃發喪畢一哭中
使召延貴以口詔令視事趣遣絨赴東都元仲經逃于外延貴捕
得殺之既歸罪仲經盧會昌得不坐絨初謀亂遣裨將陳榮詐以
文書告成德節度使王武俊求假財帛武俊大怒曰吾與汝府公

善者異恭王命非同惡也今聞已亡孰詐令其子而不俟朝言耶
何敢告我況有求也乃因陳榮而遣使讓緘焉

王虔休字君佐汝州梁人也本名延貴少涉獵書籍鄉里間以信義畏慕之尤好武藝大曆中汝州刺史李深用之爲將久之澤潞節度李抱真聞名厚以財帛招之累授兵馬使押衙建中初抱真統兵馬與諸將征討河北其雙岡水寨營等陣虔休攻戰居多擢爲步軍都虞候累加兼御史中丞大夫賜實封百戶伯抱真卒裨將元仲經等議立抱真子緘軍中擾亂虔休正色言於衆曰軍州是天子軍州將帥闕合待朝命何乃云云妄生異意軍中服從其言由是竟免潰亂朝廷知而嘉之以邕王爲昭義節度觀察大使授虔休潞州左司馬依前兼御史大夫掌留後仍賜名虔休號令安撫軍州大理二歲遷潞州長史昭義軍節度澤潞磁邢洛觀察使尋加檢校工部尚書貞元十五年卒年六十二廢朝三日贈左僕射賻以布帛米粟虔休性恭勤儉省節用管内州倉庾皆積糧儲

可支軍人數歲又常撰誕聖樂曲以進其表曰臣聞於師夫君子
爲能知樂是故審音以知聲審樂以知政則理道備矣清明廣大
終始周旋與天地同其和與四時合其序豈止於鍾鼓管磬云乎
哉臣伏見開元中天長節著于甲令每於是日海縣懽娛稱萬壽
之無疆樂一人之有慶故能追堯接舜邁禹踰湯自周已後不能
議矣臣竊以陛下降誕之辰未有惟新之曲雖大和已布於六氣
而大樂未宣於八音無乃臣子之分或有所闕愚臣不揆頑昧敢
思祖述每思歌竊抃忘寢與食久矣適遇有知音者與臣論及樂
章探微蹟奧窮理盡性臣乃遣造繼天誕聖樂一曲大抵以宮爲調
表五音之奉君也以土爲德知五運之居中也凡二十五遍法二十四
氣而足成一歲也每遍一十六拍象八元八凱登庸於朝也所翼雲
門咸池永傳於律呂空桑孤竹合薦於宮懸不聞愆謫之聲長作
中和之樂可使九域之人頓忘於肉味四夷之俗皆播於薰風與
唐惟休終古盡善臣不勝懇款屏營之至謹昧死陳獻以聞其所

造譜謹同封進先時有太常樂工劉玠流落至潞州虔休因令造此曲以進今中和樂起此也

盧從史其先自元魏已來冠冕頗盛父虔少孤好學舉進士歷御史府三院刑部郎中江汝二州刺史秘書監從史少矜力習騎射遊譚路軍節度使李長榮用爲大將德宗中歲每命節制必令採訪本軍爲其所歸者長榮卒從史因軍情且善迎奉中使得授昭義軍節度使漸狂恣不道至奪部將妻妾而辯給矯妄從事孔戡等以言直不從引去前年丁父憂朝旨未議起復屬王士真卒從史竊獻誅承宗計以希上意用是起授委其成功及詔下討賊兵出逗留不進陰與承宗通謀令軍士潛懷賊號又高其芻粟之價售於度支諷朝廷求宰相且誣奏諸軍與賊通兵不可進上深患之護軍中尉吐突承璀將神策兵與之對壘從史往往過其營博戲從史沓貪貪好得承璀出寶帶奇玩以炫耀之時其愛悅而遣焉從史喜甚日益狎上知其事取裴垍之謀因戒承璀伺其來博揖

語幕下伏壯士突起持棒出帳後縛之內車中馳以赴闕從者驚
亂斬十數人餘號令乃定且宣諭密詔追赴闕庭都將烏重脣素
懷忠順乃嚴戒其軍衆不敢動會夜使疾驅未明出境道路人莫
知元和五年四月制曰邪以蓄衆自致覆車姦以事君所宜用鉞
故楚人告變韓信患釋於事先蜀土徵災鍾會禍生於部下況害
深楚蜀功匪鍾韓構此厲階布於公議懷私負德合宣於嚴科屈
法申恩尚從於寬典前昭義軍節度副大使知節度事盧從史擢
自裨將居于大藩不思報國之誠每設徇身之計比丁家禍曾無
戚容行棄人倫孝虧天性屬常山稱亂朝制未行固願興師苟求
復位刻期効用請以身先指日投誠誓云獨致示於懷撫推以信
誠排衆論以釋其苴麻浹中心而授之鈇鉞委以重任任命之專征
章奏所陳事無違者恩光是貸予何愛焉而乃冒利蓄姦墮政敗
度成師旣出保敵而交通邪計以行臨戎而向背諸侯盡力而不
應遺寇遊魂而是託臣節旣喪恩豈念於生成台位干求禮頓虧

於忠敬肆其醜行熾以兇威至於逼脅軍中潛施賊號陵汗麾下
實玷皇風貨以藩身虐而用衆士庶怨而固恤將校勞而不圖稟
於陶鈞行事至此現於天地負我何多且辜覆載之仁寧遣神鬼
之責況頃年上請就食山東及遣旋師不時恭命致動其衆覲生
其心賴劉濟抗忠正之辭使邪堅絕遲迴之計加以徧毀隣境
密䟽事情反覆百端高下萬變心無恥愧事至滿盈朕念以始終
務於含貸所期悔過豈謂踰兇而昭義軍忠節夙彰義聲昭著
發其衆怒叶以一心顧大惡而不容幸全軀而自免宜從大戮以
正彝章尚以曾列方隅嘗經任使惜君臣之體抑中外之情俾投
魑魅之鄉以解人神之憤可貶驩州司馬嗚呼斯由事驗自開棄
絕之門禍實已招豈漏恢疎之網凡百多士宜諒朕懷子繼宗等
四人並貶嶺外

李芄字茂初趙郡人也解褐上邽主簿三遷試大理評事攝監察
御史山南東道觀察支使嚴武爲京兆尹舉爲長安尉李勉爲江

西觀察使署奏秘書郎兼監察御史爲判官永泰初轉兼殿中侍御史時宣饒二州人方清陳莊聚衆據山洞西絕江路劫商旅以爲亂凡乃請於秋浦置州守其要地以破其謀李勉然其計以聞代宗嘉之以宣州之秋浦青陽饒州之至德置池州焉凡攝行州事無幾乃兼侍御史居無何魏少遊代勉爲使復署奏檢校虞部員外郎賜金紫爲都團練副使頃之攝江州刺史州人便之丁母憂免喪永平軍節度李勉署奏檢校工部郎中兼侍御史爲判官尋攝陳州刺史歲中即值李靈耀反於汴州勉署凡兼亳州防禦使練達軍事兵備甚肅又開陳潁運路以通漕輓德宗嗣位授檢校太常少卿兼御史中丞河陽三城鎮遏使撫勞備至資廬善者必先軍士間一年爲節度使路嗣恭之副加檢校左庶子河陽三城懷州節度觀察使以東畿汜水等五縣隸焉時河南北連大兵詔益以神策攷陝之師凡進收新鄉共城遂圍衛州明年詔與河東節度馬燧等諸軍破田悅於汧水以功加檢校兵

部尚書累封開郡王實封二百戶進園悅於魏州將符璘以精騎
五百夜降其開營以納之明日歸璘於招討使上居奉天敕軍還
興元初檢校右僕射無何以疾固讓罷歸其將請告謂所親曰今
年夏被蝗旱人主厭兵革然則天下城壘堅厚矣戈鋌鋸利矣以
力勝之則有得失其可盡乎除弊之急莫先德化循而理之斯易
致耳方鎮之戴翼時主宜先退讓貪權持祿吾所不取也吾既疾
病豈能言而不踐乎乃手疏乞罷貞元元年卒年六十四廢朝一日
贈太子太保

李澄遼東襄平人隋蒲山公寬之後也居京兆父鎬清江太守以
澄贈工部尚書澄以武藝爲偏將累除試將作監隸於江淮都統
李岍建中初以檢校太子賓客兼御史中丞隸於永平軍節度使
李勉及勉移理汴州乃奏澄爲滑州刺史四年冬李希烈陷汴州
勉奔歸行在澄遂以城降希烈僞署尚書令兼滑州永平軍節度
使興元元年春澄密令親信人盧融間道賁表達於奉天上嘉之

乃以帛詔藏於蠟九中加澄刑部尚書兼汴州刺史汴滑節度觀察使澄秘而未宣乃集州兵嚴加訓習希烈頗疑之乃令養子六百人戍之以虞其變希烈苦攻寧陵邀澄率其衆至石柱澄令縱火焚營而僞遁誘六百人因驚行剽而加其罪果大俘掠悉令斬之以告希烈不能詰焉無幾何希烈遣其將翟暉等寇陳州久之未復是歲十月澄以汴州兵寡度希烈不能制己又會中官薛盈珍持節且至加檢校兵部尚書封武威郡王賜實封五百戶澄乃乘勢力焚賊旌節誓衆歸國及十一月希烈既失澄又聞翟暉大敗由是奔歸蔡州澄遽率衆將復汴州屯於城北門惟怯不敢進及宣武軍節度使劉洽師至城東門賊將田懷珍開關以納之翌日澄方自北入洽已據子城澄乃舍於浚儀縣兩軍將士曰有忿競不自安會鄭州賊將孫液通欵於澄澄遣其子倩赴之先是何陽軍節度使李芑遣其將雍顥攻鄭州顥所過縱掠液拒之尤固及清至遂納之顥怒攻液清以衆助之殺登城者數十人顥方引

退又焚陽武而歸澄乃出赴鄭州朝廷特授清檢校太子賓客兼御史中丞更名克寧貞元元年三月就加澄檢校左僕射義成軍鄭滑許等州節度使二年卒年五十四廢朝一日贈司空賙布帛粟有差仍令左散騎常侍歸崇勣充弔祭使所緣喪葬並勒官給澄實以八月癸未終克寧秘之以九月庚寅欲自起視事其行軍司馬馬鉉不許克寧陰遣殺之乃墨經而出加卒於城門將爲不順劉洽出師屯於境上以制之且使告諭切至由是克寧不敢妄發然道路絕商旅者凡十四五日及賈耽代澄克寧護喪將歸乃悉索府中財貨以夜出城軍人從而剽奪及明殆盡澄極至京師又賜克寧莊一所錢千貫粟麥三千碩澄初封隴西郡公進武威郡王每上疏連稱二封頗爲時人所哂

李元素字大朴蒲山公密之孫任侍御史時杜亞爲東都留守惡大將令狐運會盜發洛城之北運遁與其部下畋于北郊亞意其爲盜遂執訊之逮繫者四十餘人監察御史楊寧按其事亞以爲

不直密表陳之寧遂得罪亞將逞其宿怒且以得賊爲功上表指
明運爲盜之狀上信而不疑宰臣以獄大宜審奏請覆之命元素
就決亞迎路以獄成告元素驗之五日盡釋其囚以還亞大驚且
怒親追送馬上責之元素不荅亞遂上疏又誣元素元素還奏言
未畢上怒曰出俟命元素曰臣未盡詞上又曰且去元素復奏曰
一出不得復見陛下乞容盡詞上意稍緩元素盡言運寃狀明白
上乃寤曰非卿孰能辨之後數月竟得其真賊元素由是爲時器
重遷給事中時美官缺必指元素遷尚書右丞數月鄭滑節度盧
群卒遂命元素兼御史大夫鎮鄭滑就加檢校工部尚書在鎮稱
理元和初徵拜御史大夫自貞元中位缺久難其人至是元素以
名望召拜中外聳聽及居位一無修舉但規求作相久之寤不得
志見客必白無以其官散相踈也見屬官必先拜脂韋在列大失
人情李錡爲亂江南遂授元素浙西道節度觀察處置等使數
月受代入拜國子祭酒尋遷太常卿轉戶部尚書判度支元素少

孤奉長姊友劬加於人及其姊歿沉悲溝疾上疏懇辭職從之數月以出妻免官初元素再娶妻王氏石泉公方慶諸孫性柔弱元素爲郎官時娶之甚禮重及貴溺情僕妾遂薄之且又無子而前妻之子已長無良元素寢疾昏惑聽譖遂出之給與非厚妻族上訴乃詔曰李元素病中上表懇切披陳云妻王氏禮義殊乖願與離絕初謂素有醜行不能顯言以其大官之家所以今自處置訪聞不曾告報妻族亦無明過可書蓋是中情不和遂至於此脅以王命當日遣歸給送之間又至單薄不唯王氏受辱實亦朝情悉驚如此理家合當懲責宜停官仍令與王氏錢物通所奏數滿五千貫元和五年卒贈陝州大都督

史臣曰李抱王李抱真以武勇之材兼忠義之行有唐之良將也且如農隙教潞人之射數騎入武俊之營非有奇謀孰能如是惜乎服食求仙爲藥所誤王虔休不黨僭命有足可嘉盧從史動多懷姦自貽伊戚凡則老也知足澄則過而改圖元素爲御史時

執德不回居大夫日其心甚短因緣七出益露醜聲善少惡多又何足算

贊曰抱玉抱真我朝良將虔休之心亦多可尚史懷姦謀芟將祿讓澄迷却行素貪一鄉尚吾誰與欺豈如忠諒

唐書列傳第八十二

左從政郎紹興府錄事叅軍徐俊卿校勘

卷之二十一

四

唐書列傳第八十三

劉

响

李晟

子愿懇聽憑憲恕甚怙

王佖

季修

李晟字良器隴右臨洮人祖思恭父欽代居隴右爲裨將晟生數歲而孤事母孝謹性雄烈有才善騎射年十八從軍身長六尺勇敢絕倫時河西節度使王忠嗣擊吐蕃有驍將乘城拒鬪頗傷士卒忠嗣募軍中能射者射之晟引弓一發而斃三軍皆大呼忠嗣厚賞之因撫其背曰此萬人敵也鳳翔節度使高昇雅聞其名召補列將嘗擊疊州叛羌於高當川又擊宕州連狂羌於罕山皆破之累遷左羽林大將軍同正廣德初鳳翔節度使孫志直署晟樞遊兵擊破党項羌高王等以功授特進試光祿卿轉試太常卿大曆初李抱玉鎮鳳翔署晟爲右軍都將四年吐蕃圍靈州抱玉遣晟將兵五千以擊吐蕃晟辭曰以衆則不足以謀則太多乃請將兵千人疾出大震關至臨洮屠定秦堡焚其積聚虜堡帥慕容谷

種而還吐蕃因解靈州之圍而去拜開府儀同三司無幾兼左金吾衛大將軍涇原四鎮北庭都知兵馬使并惣遊兵無何節度使馬璘與吐蕃戰於鹽倉兵敗晟率所部橫擊之拔璘出亂兵之中以功封合川郡王璘已晟威名又遇之不以禮令朝京師代宗留居宿衛爲右神策都將德宗即位吐蕃寇劍南時節度使崔寧朝京師三川震恐乃詔晟將神策兵救之授太子賓客晟乃踰漏天拔飛越廓清肅寧三城絕大渡河獲首虜千餘級虜乃引退因留成都數月而還建中二年魏博田悅反將兵圍臨洛邢州詔以晟爲神策先鋒都知兵馬使與河東節度使馬燧昭義節度使李抱真合兵救臨洛尋加兼御史中丞河東昭義軍攻楊朝光於臨洛南晟與河東騎將李自良李奉國擊悅於雙岡悅兵却遂斬朝光戰於臨洛諸軍皆却晟引兵渡洛水乘冰而濟橫擊悅軍王師復振擊悅大破之三年正月復以諸道軍擊敗悅軍於汜水遂進攻魏州以功加檢校左散騎常侍實封百戶無幾兼魏府左司馬時

朱滔王武俊聯兵在深趙怒朝廷賞功薄田悅知其可間遣使求
援滔與武俊應之遂以兵圍康日知于趙州李抱真分兵二千人守
邢州馬燧大怒欲班師晟謂燧曰初奉詔進討三帥齊進李尚書
以邢州與趙州接壤分兵守之誠未爲害其精卒銳將皆在於此
今公遽自引去奈王事何燧釋然謝晟燧乃自造抱真壘與之交
歡如初王武俊攻趙州晟乃獻狀請解趙州之圍欲引兵赴定州
與張孝忠合勢欲圖范陽德宗壯之加晟御史大夫俾禁軍將軍
莫仁擢趙光銑杜季泚皆隸焉晟自魏州引軍而北徑趨趙州武
俊聞之解圍而去晟留趙州三日與孝忠兵合北略恒州圍朱滔
將鄭景於清苑決水以灌之田悅王武俊皆遣兵來救戰於白樓
賊犯義武軍稍却晟引步騎擊破之晟所乘馬連中流矢踰月城
中益急滔武俊大懼乃悉收魏博之衆而來復圍晟軍晟內圍景
濟外與滔等拒戰日數合自正月至于五月會晟病甚不知人者
數焉軍吏合謀乃以馬輿還定州賊不敢逼晟疾間復將進師會

京城變起德宗在奉天詔晟赴難晟承認詔下即日欲赴關輔義武軍聞於朱滔王武俊倚晟為輕重不欲晟去數謀阻止晟軍晟謂將吏曰天子播越於外人臣當百舍一息死而後已張義武欲沮吾行吾當以愛子為質選良馬以啗其意乃留子憑以為婚義武軍有大將為孝忠委信者謁晟晟乃解玉帶以遺之因曰吾欲西行願以為別陳赴難之意受帶者果德晟乃諫孝忠勿止晟晟得引軍踰飛狐師次代州詔加晟檢校工部尚書神策行營節度使實封二百戶晟軍令嚴肅所過樵採無犯自河中由蒲津而軍渭北壁東渭橋以逼泚時劉德信將子弟軍救襄城敗於扈澗聞難率餘軍先次渭南與晟合軍軍無統一晟不能制德信因入晟軍乃數其罪斬之晟以數騎馳入德信軍撫勞其眾無敢動者既併德信軍軍益振時朔方節度使李懷光亦自河北赴難軍於咸陽不欲晟獨當一面以分己功乃奏請與晟兵合乃詔晟移軍合懷光軍晟奉詔引軍至陳濤斜軍壘未成賊兵遽至晟乃出陣

且言於懷光曰賊堅保官苑攻之未必剋今離其窟穴敢出索戰此殆天以賊賜明公也懷光恐晟立功乃曰吾軍適至馬未秣士未飯詎可戰耶不如蓄銳養威俟時而舉晟知其意遂收軍入壘時興元元年正月也每將合戰必自異衣錦裘繡帽前行親自指導懷光望見惡之乃謂晟曰將帥當持重豈宜自表飾以啗賊也晟曰晟久在涇原軍士頗相畏服故欲令其先識以奪其心耳懷光益不悅陰有異志遷延不進晟因人說懷光曰寇賊竊據京邑天子出居近甸兵柄廟略屬在明公公宜觀兵速進晟願以所部得奉嚴令爲公前驅雖死不悔懷光益拒之晟兵軍於朔方軍北母晟與懷光同至城下懷光軍輒虜驅牛馬百姓苦之晟軍無所犯懷光軍惡其獨善乃分所獲與之晟軍不敢受久之懷光將謀沮晟軍計未有所出時神策軍以舊例給賜厚於諸軍懷光奏曰賊寇未平軍中給賜咸宜均一今神策獨厚諸軍皆以爲言臣無以止之惟陛下裁處懷光計欲因是令晟自署侵削己軍以撓

破之德宗憂之欲以諸軍同神策則財賦不給無可奈何乃遣翰林學士陸贄往懷光軍宣諭仍令懷光與晟參議所宜以聞贄晟俱會於懷光軍懷光言曰軍士稟賜不均何以今戰贄未有言數顧晟晟曰公爲元帥施張號令皆得專之晟當將一軍唯公所指以効死命至於增損衣食公當裁之懷光默然無以難晟又不欲侵刻神策軍發自於己乃止懷光屯咸陽堅壁八十餘日不肯出軍德宗憂之屢降中使促以收復之期懷光託以卒疲更請休息以伺其便然陰與朱泚交通其迹漸露晟懼爲所併乃密疏請移軍東渭橋以分賊勢上初未之許晟以懷光反狀已明緩急宜有所備蜀漢之路不可壅也請以裨將趙光鈐爲洋州刺史唐良臣爲利州刺史晟子壻張或爲劍州刺史各將兵五百以防未然上初納之未果行無何吐蕃請以兵佐誅泚上欲親撓六師移幸咸陽以促諸軍進計懷光聞之大駭疑上奪其軍謀亂益急時鄜坊節度李建徽神策將陽惠元及晟並與懷光聯營晟以事迫會有

中使過晟軍晟乃宣令云奉詔徙屯渭橋乃結陣而行至渭橋不數日懷光果劫建徽惠元而併其兵建徽遁免惠元爲懷光所害是日車駕幸梁州時變生蒼卒百官扈從者十二三駱谷道路險阻儲供無素從官乏食上歎曰早從李晟之言三蜀可坐致也晟大將張少弘自行在傳口詔授晟尚書左僕射同中書門下平章事以安衆心晟拜哭授命且曰長安宗廟所在爲天下本若皆執羈勒誰復京師乃浚城隍繕兵甲以圖收復晟以孤軍獨當強寇恐爲二賊之所併乃卑詞厚幣僞致誠於懷光外示推崇內爲之備時菊粟未集乃令檢校戶部郎中張或假京兆少尹擇官吏以賦渭北畿縣不旬日菊糧皆足晟乃大陳三軍令之曰國家多難亂逆繼興屬車駕西幸關中無主予代受國恩見危死節臣子之分況當此時不能誅滅兇渠以取富貴非人豪也渭橋橫跨大川斷賊首尾吾與公等勦力勤王擇利而進興復大業建不世之功能從我乎三軍無不泣下曰唯公所使晟亦歔歔流涕是時朱泚

盜據京城懷光圖爲反噬河朔僭僞者三李納虎視於河南希烈
鷗張於汴鄭晟內無貲財外無轉輸以孤軍而抗劇賊而銳氣不
衰徒以忠義感於人心故英豪歸向戴休顏率奉天之衆韓遊瓌
治邠寧之師駱元光以華州之兵守潼關尚可孤以神策之旅屯
七盤皆稟晟節度晟軍大振懷光以休顏遊瓌從晟益懼晟又
致書於懷光諭以禍福令破賊迎鑾以掩前過懷光卒不悟軍衆
漸多離散糗糧且竭虜剽無所得懼爲晟所襲三月懷光自三
原富平東抵奉天所至焚掠乃自馮翊入據河中懷光將孟涉段
威勇者本神策將惡懷光之不臣旣至富平結陣於軍中外向大
呼而去懷光不能制涉威勇以數千人歸晟乃陳兵受涉等降卒
乃奏授涉檢校工部尚書威勇兼御史大夫德宗之幸山南旣入
駱谷謂渾瑊曰渭橋在賊腹內兵勢懸隔李晟可辦事乎瑊對曰
李晟秉義執志臨事不可奪以臣計之破賊必矣帝意始安是月
渾瑊步將上官望自間道懷詔書加晟檢校右僕射兼河中尹河

中晉絳慈隰節度使益實封三百戶又兼京畿渭北鄜坊丹延節度招討使晟承詔詠涕時帝欲移幸西川晟上表請駐蹕梁漢繫億兆之心圖翦滅之勢若規小捨大作都岷峨即人心失望武士謀臣無所施矣四月有詔加晟京畿渭北鄜坊商華兵馬副元帥時京兆府司錄李勣仲自京城來諫議大夫鄭雲逵自奉天至晟以京兆少尹張或爲副使鄭雲逵爲行軍司馬李勣仲爲節度判官俾同主軍畫又請以懷光舊將唐良臣保潼關以河中節度授之戴休顏守奉天請以鄜坊節度授之上皆從之渭橋舊有粟十餘萬斛度支先饋懷光軍欲盡晟又奏曰近畿雖乘兵亂猶可賊斂儻寇賊未滅宿兵曠時人廢耕桑又無儲蓄非防微制勝之術也上納之晟乃於畿甸率聚征賦吏民樂輸守禦益固由是軍不乏食神策軍家族多陷於此晟家亦百口在賊中左右或有言及家者晟因泣下曰乘輿何在而敢恤家乎此又使晟小吏王無忌之婿詣晟軍且曰公家無恙城中有書聞晟曰爾敢與賊爲間遽命

斬之時轉輸不至盛夏軍士或衣裘褐晨亦同勞苦每以大義奮
激士心卒無離叛者會將吏數輩自賊中逃來言此衆携離可滅
之狀士心益奮先是賊將姚令言及偽中丞崔宣咸使諜覘我軍爲
羅騎所得拘送於晟晟解縛食而遣之誠之曰爾報崔宣善爲賊
守諸人勉力自固勿不忠於賊也五月三日晟引軍抵通化門耀武
而還賊不敢出晨集將佐圖兵所向諸將曰先拔外城既有市里
然後北清宮闕晟曰若先收坊市巷陌隘狹間以居人若賊設伏
格鬥百姓囂潰非計也且賊重兵堅甲皆在苑中若自苑擊其心
腹彼將圖走不暇如此則宮闕保安市不易肆計之上也諸將曰善
乃移書渾瑊駱元光尚可孤剋期進軍於城下其月二十五日夜晟
自東渭橋移軍於光泰門外米倉村以薄京城晟臨高指麾令設
壕柵以候賊軍俄而賊衆大至賊驍將張庭芝李希倩逼柵求戰
晟謂諸將曰吾恐賊不出今冒死而來天贊我也勒吳詵康英俊
史萬頃孟涉等縱兵擊之時華州營在北兵少賊併力攻之晟遣

李演孟華以精卒救之中軍鼓譟演力戰大破之乘勝入光泰門再戰又敗之殭屍蔽地餘衆走入白華夜聞慟哭之聲翌日將復出師諸將請待西軍至則左右夾攻晟曰賊旣傷敗須乘勝撲滅若俟其有備豈王師之利耶如待西軍恐失機便二十八日晟大集諸將駱元光尚可孤兵馬使吳詵王泌都虞候邢君牙李演史萬頃神策將孟涉康英俊華州將郭審金權文成商州將彭元俊等號令誓師畢陳兵於光泰門外乃使王泌李演率騎軍史萬頃領步卒直抵苑牆神廩村晟先是夜使人開苑牆二百餘步至是賊已樹木柵之賊倚柵拒戰晟叱軍士曰安得縱賊如此當先斬公等萬頃懼先登拔柵而入王泌騎軍繼進賊即奔潰獲賊將段誠諫大軍分道並入鼓譟雷動姚令言張庭芝李希倩猶力捍官軍晟令決勝軍使唐良臣兵馬使趙光錕楊萬榮孟日華等步騎齊進賊軍陣成而屢北戰十餘合乘勝驅蹙至于白華忽有賊騎千餘出於官軍之背晟以麾下百餘騎馳之左右呼曰相公來賊聞

之擁潰官軍追斬不可勝計朱泚姚令言張庭芝尚有衆萬人相率遁走晟遣田子奇追之其餘兇黨相率來降是日晟軍入京城勒兵屯於含元殿前晟舍於右金吾仗仍號令諸軍曰晟實不武上憑睿筭下賴士心幸得殲厥兇渠肅清宮禁皆三軍之力也長安士庶久陷賊庭若小有震驚則非伐罪弔人之義也晟與公等各有家室離別數年今已成功相見非晚五日內不得輒通家信違命者斬乃遣京兆尹李齊運攝長安令陳元衆攝萬年令韋上假告諭百姓居人安堵秋毫無所犯尚可孤軍人有擅取賊馬者晟大將高明曜虜賊女妓一人司馬伯取賊馬二匹晟皆立斬之莫敢忤視士庶無不感悅咸獻欵詠涕遠坊居人亦有經宿方知者二十九日令孟涉屯於白華尚可孤屯望仙門駱元光屯章敬寺晟自屯於安國寺是日斬賊將李希倩等八人徇于市六月四日晟破賊露布至梁州上覽之感泣群臣無不隕涕因上壽稱萬歲奏曰李晟虔奉聖謨湯滌兇醜然古之樹勲力復都邑者往往

有之至於不譙宗廟不易市肆長安人不識旗鼓安堵如初自
三代已來未之有也上曰天生李晟爲社稷萬人不爲朕也百
官拜賀而退是日晟斬僞相李忠臣張光晟蔣鎮喬琳洪經綸崔
宣等又表守臣節不屈于賊者程鎮之劉迺蔣沆趙曄薛炎等晟
初屯渭橋時熒惑守歲久之方退賓介或勸曰今熒惑已退皇家
之利也可速用兵晟曰天子外次人臣但當死節垂象玄遠吾安
知天道耶至是謂叅佐曰前者士大夫勸晟出兵非敢拒也且軍
可用之不可使知之嘗聞五緯盈縮無準晟懼復來守歲則我軍
不戰而自潰叅佐歎服皆曰非所及也尋拜晟司徒兼中書令實
封一千戶晟綜理以備百司令大將吳詵將兵三千至寶雞清道
晟又請至鳳翔迎扈不許七月十三日德宗至自興元渾瑊韓遊
瓌戴休顏以其兵扈從晟與駱元光尚可孤以其兵奉迎時元從
禁軍及山南隴州鳳翔之衆步騎凡十餘萬旌旗連亘數十里傾
城士庶夾道歡呼晟以戎服謁見于三橋上駐馬勞之晟再拜稽

首初賀元惡殄滅宗廟再清官闈咸肅抃舞感涕跪而言曰臣忝
備爪牙之任不能早誅妖逆致鑾輿再遷及師於城隅累月方殄
賊寇皆臣庸懦不任職之責敢請死罪伏於路左上爲之掩涕命
給事中齊映宣旨令左右起晟於馬前是月御殿大赦贈晟父欽
太子太保母王氏贈代國夫人賜永崇里第及涇陽上田延平門
之林園女樂八人入第之日京兆府供帳酒饌賜教坊樂具鼓吹
迎導宰臣節將送之京師以爲榮觀上思晟勲力製紀功碑俾皇
太子書之刊石立於東渭橋與天地悠久又令太子書碑詞以賜
晟晟以涇州倚邊屢害京師數爲亂階乃上書請理不用命者兼
備耕以積粟攘却西蕃上皆從之詔以晟兼鳳翔尹鳳翔隴右節
度使仍充隴右涇原節度兼管內諸軍及四鎮北庭行營兵馬副
元帥改封西平郡王初帝在奉天鳳翔軍亂殺其帥張鎰立小將
李楚琳至是楚琳在朝晟請以楚琳俱往鳳翔將誅之上以初復
京師方安反側不許八月晟至鳳翔理殺張鎰之罪斬王斌等十

餘人初朱泚亂時涇州亦殺其帥馮河清立別將田希鑒方屬播遷不遑討伐以涇帥授之至是晟奏曰近者中原兵禍皆起涇州且其地逼西戎易爲反覆希鑒凶徒將校驕逆若不懲革終爲後患從之晟至鳳翔託以巡邊至涇州希鑒迎謁於坐執而誅之并誅害河清者石奇等三十餘人具事以聞上曰涇州亂逆泉藪非晟莫能理之還鎮表右龍武將軍李觀爲涇原節度使吐蕃深畏之晟常曰河隴之陷也豈吐蕃力取之皆因將帥貪暴種落携貳人不得耕稼展轉東徙自棄之耳且土無絲絮人苦征役思唐之心豈有已乎乃傾家財以賞降者以懷來之降虜浪息曩晟奏封王母蕃使至晟必置息曩於坐衣以錦袍金帶以寵異之蕃人皆相指目榮羨息曩蕃相尚結贊頗多詐謀尤惡晟乃相與議云唐之名將李晟與馬燧渾瑊耳不去三人必爲我憂乃行反閒遣使因馬燧以請和旣和即請盟復因盟以虜瑊因以賣燧貞元二年九月吐蕃用尚結贊之計乃大興兵入隴州抵鳳翔無所虜掠

且曰召我來何不以牛酒犒勞徐乃引去持是閒晟也是役也晟
先令衙將王佖選銳兵三千設伏於汧陽誠之曰蕃軍過城下勿
擊首尾首尾縱敗中軍力全若合勢攻必受其弊但俟其前軍
已過見五方旗武豹衣則其中軍也突其不意可建奇功佖如晟
節度果遇結贊及出奮擊賊皆披靡佖軍不識結贊故結贊僅而
獲免十月晟出師襲吐蕃摧沙堡拔之斬其堡使扈屈律悉蒙等
自是結贊數遣使乞和十二月晟朝京師奏曰戎狄無信不可許宰
相韓滉又扶晟議請調軍食以給晟命將擊之上方戢兵疑將帥
生事邀功會滉卒張延賞秉政與晟有隙屢於上前閒晟言不可
父令典兵延賞欲用劉玄佐李抱真委以西北邊事俾立功以堅
晟德宗音納延賞之言罷晟兵柄三年三月冊拜晟爲太尉中書
令奉朝請而已其年閏五月渾瑊與尚結贊同盟於平涼果爲蕃
兵所劫瑊單馬僅免將吏皆陷六月罷河東節度使馬燧爲司徒
盡中尚結贊之謀晟旣罷兵權朝謁之外罕所過從有通王府長

史丁瓊者亦爲張延賞所排心懷怨望乃求見晟言事且曰太尉功業至大猶罷兵權自古功高無有保全者國家儻有變故瓊願備左右狡兔三穴蓋早圖之晟怒曰爾安得不祥之言遽執瓊以聞四年三月詔爲晟立五廟以晟高祖芝贈隴州刺史曾祖嵩贈澤州刺史祖思恭贈幽州大都督廟成官給牲牢祭器牀帳禮官相儀以祔焉五年九月晟與侍中馬燧見於延英殿上嘉其勲力詔曰昔我列祖乘乾坤之邊滌掃隋季之荒屯體元御極作人父母則亦有能罷之士不二之臣左右經綸叅弼締構昭文德恢武功威不若康不义用端命于上帝付俾四方宇宙旣清日月旣貞王業旣成太階旣平乃圖厥容列于斯閣懋昭績効式表儀形一以不忘于朝夕一以永垂乎來裔君臣之義厚莫重焉貞元己巳歲秋九月我行西宮瞻宏閣崇構見老臣遺像顒然肅然和韶在色想雲龍之叶應感致業之艱難覩往思今取類非遠且功與時並才爲代生苟蘊其才遇其時尊主庇人何代不有在中宗則相

彥範等著其主戴之績在玄宗則劉幽求等申翼奉之勲在肅宗則郭子儀掃殄氛祲今則李晟等保寧朕躬咸宣力肆勤光復宗社訂之前烈夫豈多謝闕而未錄孰謂旌賢況念功紀德文祖所爲也在予曷其敢忘有司宜叙年代先後各圖其像於舊臣之次仍令皇太子書朕是命紀于壁焉庶播嘉庸式昭于下俾後來者尚揖清顏知元勲之不朽復命皇太子書其文以賜晟晟刻石於門左初晟在鳳翔謂賈介曰魏徵能直言極諫致太宗於堯舜之上具忠臣也僕所慕之行軍司馬李叔度對曰此搢紳儒者之事非勲德所宜晟斂容曰行軍失言傳稱邦有道危言危行今休明之期晟幸得備位將相必有不可忍而不言豈可謂有犯無隱知無不爲者耶是非在人主所擇耳叔度慙而退故晟爲相每當上所顧問必極言匪躬盡大臣之節性沉默未嘗泄於所親臨下明察每理軍必曰某有勞某能其事雖廝養小善必記主名尤惡下爲朋黨相構好善嫉惡出於天性嘗有恩者厚報之初譚元澄爲

嵐州刺史嘗有恩於晟後坐貶於岳州比晟貴上疏理之詔贈元澄寧州刺史元澄三子晟撫持勤至皆爲成就官學人皆義之理家以嚴稱諸子姪非晨昏不得謁見言不及公事視王氏甥如己子嘗正歲崔氏女歸省未及階晟却之曰爾有家況姑在堂婦當奉酒醴供饋以待賓客遂不視而遣還家其達禮敦教如此貞元九年八月薨時年六十上震悼出涕廢朝五日令百官就第臨弔命京兆尹李元監護喪事官給葬具賻賻加等比大斂上手書致意送柩前曰皇帝遣官闡令第五守進致言於故太尉中書令西平郡王贈太師之靈曰天祚我邦是生才傑稟陰陽之粹氣實山岳之降靈弘濟患難保佑王室掃湯盪氛禳廓清上京忠誠感於人神功業施於社稷臣時定亂實賴元勲洎領上台克諧中外訐謨帝道叶赫登猷常竭嘉言以臣不迫情所親重義無間然方期與國同休永爲邦翰比嬰疾恙雖歷旬時日異痊除重期相見彌子在位終致和平豈圖藥餌無徵奄至薨逝喪我賢哲虧我股

肱天不憖遺痛惜何極嗚呼大厦方構旋失棟樑巨川未濟遂亡舟楫君臣之義追慟益深循省遺章倍增感切卿一門肖嗣朕必終始保持況愿等弟兄承卿教訓朕之志義豈忘平生縱卿不言朕亦存信比者卿在之日却未見朕深心今卿與朕長乖方異知朕誠志無以爲念發言涕零是用躬述數行貴寫所懷得盡臨紙遣使不能飾詞魂而有知當體朕意冊贈太師諡曰忠武晟薨後城鹽州復鹽池上賜宰臣新鹽惻然思晟乃令致鹽於靈座又時遣中使至晟第存撫諸子教戒備至聞愿等有一善上喜形於色終始無與晟比元和四年詔曰夫能定社稷濟生人存不朽之名垂可久之業者必報以殊常之寵待以親比之恩與國無窮時惟茂典故奉天定難功臣太尉兼中書令上柱國西平郡王食實封一千五百戶贈太師李晟間代英賢自天忠義邁濟時之宏筭抱經武之長材員以至誠協于一德嘗遭屯難之際實著戡定之功鯨鯢既殲宮廟斯復眷茲勲伐則旣褒崇永言天步之夷載懷邦

傑之力思加崇於往烈爰協比於後昆睦以宗親將子厚意其家
宜令編附屬籍晟配饗食德宗廟庭晟十五子侗侑皆無祿早世次
愿聰摠孫憑恕憲愬懿聽甚愿聰摠官卑而卒而愿愬聽最知名
愿幼謙謹寡過晟立大勲諸子猶無官宰相奏陳德宗即日召愿
拜銀青光祿大夫太子賓客上柱國舊制勲至上柱國賜門戟即
令賜愿乃與父並列棨戟於門九年丁父憂十一年服闋德宗召
見愿等於延英憫然久之曰朕在宮中常念卿等追懷勲德何日
忘之又聞卿等居喪得禮朕甚嘉之各賜衣一襲絹三千匹愿依
前授太子賓客兄弟同日拜官者九人尋轉左衛大將軍元和元
年八月檢校禮部尚書兼夏州刺史夏綬銀宥等州節度使威令
簡肅甚得綏懷之術客有亡馬者以狀告愿愿以狀勝於路懸金
以購之不三日所亡馬繫之榜下仍置書一緘曰馬逸及群不時
告罪當死敢以良馬一匹贖罪并亡馬謹納於路愿付客亡馬而
縱其良馬境內嚴肅多如此類轉徐州刺史武寧軍節度使到鎮

以青鄆不恭奉命討伐屠城下邑捷奏屢聞無何有疾以其弟愬
代爲徐帥入爲刑部尚書疾愈檢校尚書左僕射兼鳳翔尹鳳翔
隴右節度使然自是頗怠於爲理無復素志聲色之外全不介懷
長慶二年二月檢校司空兼汴州刺史宣武軍節度使先是張弘
靖爲汴帥以厚賞安士心及愬至帑藏已竭而愬恣其奢侈門內
數百口仰給官司不恤軍政賞賚不及弘靖時而以威刑馭下又
令妻弟竇緩將親兵緩亦驕傲瀆貨以是群情聚怨是歲七月四
日夜牙將李臣則薛志忠秦隣等三人宿直突入竇緩帳中斬緩
首以徇愬聞有變與左右數人露髮而走登子城北樓懸縋而下
水由窻而出比曉行十數里遇野人驅驢奪而乘之得至鄭州愬
妻竇氏死於亂兵之手子三人匿而獲免僕妾爲軍士所俘城中
大掠三日乃立其牙將李介爲留後以邀旄鉞月餘方誅之愬坐
貶隨州刺史朝廷念愬之勲終不加罪入爲左金吾衛大將軍長
慶四年六月復檢校司空兼河中尹充河中晉絳慈隰節度使河

中之政亦如岐梁加以愿結託權幸厚行賂遺賦入隨盡軍府蕭然賴遽疾終不爾蒲人必有更變寶應元年六月卒贈司徒

愬以父蔭起家授太常寺協律郎遷衛尉少卿愬早喪所出保養於晉國夫人王氏及卒晟以本非正室令服總號哭不忍晟感之因許服縗既練丁父憂愬與仲弟憲廬于墓側德宗不許詔令歸第居一宿徒跣復往上知不可奪遂許終制服闋授右庶子轉少府監左庶子出爲坊晉二州刺史以理行殊異加金紫光祿大夫復爲庶子累遷至太子詹事宮苑閑廐使愬有籌略善騎射元和十一年用兵討蔡州吳元濟七月唐鄧節度使高霞寓戰敗又命袁滋爲帥滋亦無功愬抗表自陳願於軍前自効宰相李逢吉亦以愬才可用遂檢校左散騎常侍兼鄧州刺史御史大夫充隨唐鄧節度使兵士摧敗之餘氣勢傷沮愬揣知其情乃不肅軍陣不齊部伍或以不肅爲言愬曰賊方安袁尚書之寬易吾不欲使其改備乃給告三軍曰天子知愬柔而忍恥故令撫養爾輩戰者非吾

事也軍衆信而樂之愬又散其優樂未嘗宴樂士卒傷夷者親自撫之賊以嘗敗高表二帥又以愬名位非所畏憚者不甚增其備愬沉勇長筭推誠待士故能用其卑弱之勢出賊不意居半歲知人可用乃謀襲蔡表請濟師詔河中鄜坊驍兵三千人益之由是戶緝器械陰計戎事嘗獲賊將丁士良召入與語辭氣不撓愬異之因釋其縛置爲捉生將士良感之乃曰賊將吳秀琳惣衆數千不可遽破者用陳光洽之謀也士良能擒光洽以降秀琳愬從之果擒光洽十二月吳秀琳以文成柵兵三千降愬乃徑從之新興柵遂以秀琳之衆攻吳房縣收其外城初將攻吳房軍吏曰往日請避之愬曰賊以往亡爲吾不來正可擊也及戰勝捷而歸賊以驍騎五百追愬愬下馬據胡床令衆悉力赴戰射殺賊將孫忠憲乃退或勸朝愬遂拔吳房愬曰取之則合勢而固其穴不如留之以分其力初吳秀琳之降愬單騎至柵下與之語親釋其縛署爲衙將秀琳感恩期於効報謂愬曰若欲破賊須得李祐某無能爲也

祐者賊之騎將有膽略守興橋樞常侮易官軍去來不可備朔召其將史用誠誠之曰今祐以衆穫麥於張柴爾可以三百騎伏旁林中又使揺旆於前示將焚麥者祐素易我軍必輕而來逐爾以輕騎搏之必獲祐用誠等如其料果擒祐而還官軍常苦祐皆請殺之朔不聽解縛而客禮之朔乘閒常召祐及李忠義屏人而語或至夜分忠義亦降將也本名憲朔致之軍中多諫朔朔益寵祐始募敢死者三十人以爲突將朔自教習之朔將龍襄元濟會雨水自五月至七月不止溝塍潰溢不可出師軍吏咸以不殺祐爲言簡翰日至且言得賊謀者具言其事朔無以止之乃持祐泣曰豈天意不欲平此賊何爾一身見奪於衆口朔又慮諸軍先以謗聞則不能全祐乃械送京師先表請釋且言必殺祐則無以成功者比祐至京詔釋以還朔乃署爲散兵馬使令佩刀巡警出入帳中略無猜閒又改爲六院兵馬使舊軍令有舍賊謀者屠其家朔除其令因使厚之謀反以情告朔朔益知賊中虛實陳許節度使李

光顏勇冠諸軍賊悉以精卒抗光顏由是愬乘其無備十日將襲蔡州其月七日使判官鄭解告師期於裴度十日夜以李祐率突將三千爲先鋒李忠義副之愬自帥中軍三千田進誠以後軍三千殿而行初出文成柵衆請所向愬曰東六十里止至賊境曰張柴若盡殺其戍卒令軍士少息繕羈勒甲冑發刃彀弓復建旆而出是日陰晦雨雪大風裂旗旆馬慄而不能躍士卒苦寒抱戈僵仆者道路相望其川澤梁逕險夷張柴已東師人未嘗蹈其境皆爲投身不測初至張柴諸將請所止愬曰入蔡州取吳元濟也諸將失色監軍使哭而言曰果落李祐計中愬不聽促令進軍皆爲必不生還然已從愬之令無敢爲身計者愬道分五百人斷涇曲路橋其夜東死者十二三又分五百人斷朗山路自張柴行七十里比至懸瓠城夜半雪愈甚近城有鵝鴨池愬令礮擊之以雜其聲賊恃吳房朗山之固晏然無一人知者李祐李忠義坎墉而先登敢銳者從之盡殺守門卒而登其門留擊柝者黎明雪亦止愬入

止元濟外宅蔡吏告元濟曰城已陷矣元濟曰是洎曲子弟歸求
寒衣耳俄聞愬軍號令將士云常侍傳語乃曰何常侍得至於此
遂驅率左右乘子城拒捍田進誠以兵環而攻之愬計元濟猶望
董重質來救乃令訪重質家安卹之使其家人持書召重質重質
單騎而歸愬白衣泥首愬以客禮待之田進誠焚子城南門元濟
城上請罪進誠梯而下之乃檻送京師其申光二州及諸鎮兵尚
二萬餘人相次來降自元濟就擒愬不戮一人其爲元濟執事帳
下廚廐之間者皆復其職使之不疑乃屯兵鞠場以待裴度翌日
度至愬具橐鞬候度馬首度將避之愬曰此方不識上下等威之
分久矣請公因以示之度以宰相禮受愬迎謁衆皆聳觀明日愬
軍還於文城柵十一月詔以愬檢校尚書左僕射兼襄州刺史山
南東道節度襄鄧隨唐復郢均房等州觀察等使上柱國封涼
國公食邑三千戶食實封五百戶一子五品正員憲宗有意復隴
右故地元和十三年五月授愬鳳翔隴右節度使仍詔路由闕下

朔未發屬李師道再叛詔田弘正義成宣武等軍討之乃移愬爲
徐州刺史武寧軍節度使代其兄愿兄弟交換岐徐三鎮旬日間
再踐父兄之任愬至徐方理兵有方略時蔡將董重質貶春州司
戶愬上表請恕重質賜之堪於軍前驅使即詔徵還送武寧軍愬
乃署爲牙將愬破賊金鄉凡十一戰擒賊將五十俘斬萬計淄青
平將有事燕趙元和十五年九月以愬檢校左僕射同中書門下
平章事潞州大都督府長史昭義節度使仍賜興寧里第十月王
承宗卒魏博田弘正移任鎮州愬至潞州四月遷魏州大都督府
長史魏博節度使長慶元年幽鎮復亂愬聞之素服以今三軍曰
魏人所以富庶而能通知聖化者由田公故也天子以其仁而愛人
使理鎮異且田公出於魏撫師七年一旦鎮人不道敢茲殘害以
魏爲無人也若父兄子弟食田公恩者其何以報衆皆慟哭又以
王帶寶劍與牛元翼遣使謂之曰吾先人常以此劍立大勳吾又
以此劍平蔡寇今鎮人叛逆公以此前之元翼承命感激乃以劍及

帶令於軍中報之曰願以衆從竭其死力方有制置會疾作不能
治軍人違紀律功遂無成朝廷以田布代之除太子少保歸東都
是年十月卒於洛陽時年四十九穆宗聞之震悼贈賻加等贈太
尉始晟克復京城市不改肆及愬平淮蔡復踵其美父子仍建大
勲雖昆仲皆領兵符而功業不侔於愬近代無以比倫加以行己
有常儉不違禮弟兄席父勲寵率以僕馬第宅相矜唯愬六遷
大鎮所處先人舊宅一院而已晚歲忽於取士辟請不得其人至
使吏緣爲奸軍政不肅物論稍減惜哉

聽七歲以蔭授太常寺協律郎常入公署吏胥小之不爲致敬聽
令鞭之見血父晟哥之後隨吐突承璀討王承宗爲神策行營兵
馬使時昭義盧從史持兩端無心討賊承璀用聽計擒從史以獻
轉左驍衛將軍兼御史中丞出爲安州刺史隨鄂岳觀察使柳公
綽討吳元濟軍中動靜悉用聽謀軍聲遂振元和中討李師道聽
爲楚州刺史統淮南之師鄆人素易淮軍聽潛訓練出其不意趨

海州據險要破沐陽兵降朐山戎懷仁東海兩城望風乞降山東
平元和十四年五月以功授檢校左散騎常侍夏州刺史夏綏銀
宥節度使十五年六月改靈州大都督府長史靈鹽節度使境內
有光祿渠廢塞歲久欲起屯田以代轉輸聽復開使舊渠溉田千
餘頃至今賴之就加檢校工部尚書初聽爲羽林將軍有名馬穆
宗在東宮令近侍諷聽獻之聽以職摠親軍不敢從及即位之始
幽冀不廷太原與三鎮接境方議易帥宰臣進擬上皆不允謂宰
臣曰李聽爲羽林將軍不與朕馬是必可任長慶二年二月授檢
校兵部尚書太原尹北京留守河東節度使代裴度四年七月轉
滑州刺史義成軍節度使大和二年討李同捷時魏博行營將于
志沼潛結滄鎮擅迴戈攻其帥史憲誠詔聽帥師援之大破其叛
卒志沼奔鎮州爲王庭湊所殺聽遂凱旋以功封涼國公授子五
品官王庭湊再違朝旨詔聽以全師屯貝州路由魏州史憲誠懼
聽見籠裹衷甲郊迎候吏密白聽乃令兵士匣刀橐弓休於野外魏

人遂安後憲誠欲入覲竭其府庫魏人怨之殺憲誠衙軍立其大將何進滔詔聽兼領魏博節度使將兵北渡魏人不納聽棄城拒守乃屯兵館陶魏兵遽襲聽不爲備其軍大敗無復部伍晝夜奔走僅而獲免喪師過半輜車兵仗並皆委棄御史中丞溫造殿中侍御史崔彥玄彈之曰臣聞賞罰不立無以示天下是非一貫莫能建大中竊見義成軍節度使李聽昨者資其承藉委以統戎俾代憲誠付之雄鎮揔二萬虎貔之旅位極寵榮兼兩藩節制之權心無報効況陛下授以神筭假以天威入魏之期剋日先定而聽擁旄觀望按甲遷延熒惑人心逗撓軍政遂使憲誠陷於屠戮亂衆肆其斲兇失六郡於垂成固危巢於已覆委貝州而不守燒劫無遺望淺口而疾驅狼狽就道自圖苟免不羞苞羞蔑棄朝章有同兒戲魏州之亂職聽之由論其負恩萬死猶幸伏以封常清河南失律斬於關門高霞寓唐鄧破傷投諸遐裔渾縞節制易定將戰而兵力不支表滋逗留西川欲進而兇渠尚在或親當矢石

或躬歷艱危勢屈賊鋒音申朝典未曾貸法必震皇威今李聽罪
狀夙聞中外憤惋比之常清等輩萬萬過之若陛下猶示含弘不
寬極法臣等恐憲章墜地天下寒心伏請付法上不之罪罷兵柄
爲大子少師聽頗賂遺權幸以爲援居無何復檢校司徒起爲邠
寧節度使邠州衙廳相傳不利葺修以至隳壞聽曰帥臣鑿凶門
而出豈有拘于巫祝而隳公署耶遂命葺之卒無變異大和六年
轉武寧軍節度使時聽有蒼頭爲徐州將不欲聽至聽先使親吏
慰勞徐人爲蒼頭所殺聽不敢進固以疾辭用爲太子太保七年
出守鳳翔時人榮之九年改陳許節度未至鎮復除太子太保分
司開成元年出爲河中尹河中晉慈隰節度使四年以疾求代除
太子太保是歲十月卒時年六十一贈司徒聽十領節旌所不至
者三鎮位官苛細好將迎遺賂故急於聚斂窮極侈欲位至一品
晉終牖下非西平之遺德焉能及此乎

憲晟第五子晟十子憲翹最仁孝及長好儒術以禮法修整起家

太原府叅軍醴泉縣尉于頔鎮襄陽辟爲從事時吳少誠據淮西獨憚頔之威當時咸以憲謀畫致之元和八年田弘正以魏博奉朝旨辟憲爲從事授衛州刺史遷絳州所至以理行稱入爲宗正少卿遷光祿卿穆宗即位以太和公主降迴鶻命金吾大將軍胡証充送公主使命憲副之使還獻入蕃道里記遷檢校左散騎常侍兼太府卿出爲洪州刺史江西觀察使大和二年轉嶺南節度使憲雖勲伐之家然累歷事任皆以吏能擢用所履官秩政績派聞性本明恕尤精律學屢詳決冤獄活無罪者數百人以能入官官無敗事士君子多之大和三年八月卒時年五十六憲累歷諸衛大將軍恕太子洗馬並以蔭授官累遷至少卿監甚累官至右龍武大將軍沉酒酒色恣爲豪侈積債至數千萬其子貸迴鶻錢壹萬餘貫不償爲迴鶻所訴文宗怒貶甚爲定州司法叅軍

王伋晟之甥雄武善騎射自晟河西河北出師伋無役不從朱泚之亂晟攻賊於光泰門賊鋒尚勁伋與兵馬使李演踰苑牆血戰

敗賊前鋒諸軍方振論功爲神策將吐蕃之寇涇原伏卒擊尚
結替幾獲由是深爲吐蕃所畏晟視必恩寵與愿懇不殊給與過
之晟旣爲張延賞媒孽罷兵權亦不用必爲將帥入爲左衛上將
軍元和中原朔兄弟在方鎮必檢校工部尚書靈州大都督府長
史朔方靈鹽鄜度使先是吐蕃欲成烏蘭橋於河壩先貯材木朔
方節度使每遣人潛載之委於河流終莫能成至是蕃人知必貪
而無謀先厚遺之然後併役成橋仍築月城圍守之自是朔方禦
寇不暇邊上至今爲恨長慶三年四月卒

史臣曰西平器偉材雄人望而畏出身事主落落有將帥之風見
義能勇聽受不疑忠於事君長於應變誠一代之賢將也觀恒山
之役立談釋二帥之憾涇師之亂號哭赴奉天之危可不爲忠義
乎對白華之進軍知平涼之必詐沮星變之議移渭橋之軍可不
爲應變乎解帶結孝忠之心請婚釋延賞之怨嫉惡有楚琳之請
懲亂行希奭之誅可不爲明於決斷乎而德宗皇帝聽斷不明無

人君之量俾功臣困讒慝之口奸人秉衡石之權丁璽之言誠堪
太息雖齟齬刻渭橋之石區區賜煙閣之銘亦何心哉作善遺慶
諸子俱才元和平賊之功聽愬居其半父子昆弟皆以功名始終
道家所忌之談李氏以善勝矣

贊曰栢栢太師義勇天資運鍾禍亂力拯顛危愬事章武誅蔡
平齊凌煙畫圖父子爲宜

唐書列傳卷八十三

左從政郎紹興府錄事叅軍徐俊卿校勘

唐書列傳第八十四

劉

昉

纂修

馬燧

燧子暢

燧兄炫

渾瑊

瑊子鎰

聞人詮校刻沈桐同校

馬燧字洵美汝州郟城人其先自右扶風徙焉祖珉官至左玉鈴衛
舍曹父季龍嘗舉明孫吳俶儻善兵法官至嵐州刺史幽州經畧軍
使燧少時嘗與諸兄讀書乃輟卷歎曰天下將有事矣丈夫當建功
於代以濟四海安能矻矻爲一儒哉燧姿度魁異長六尺二寸沉勇
多智畧該涉群書尤善兵法安祿山反俾光祿卿賈循守范陽燧說
循曰祿山負恩首亂雖陷洛城必當夷滅公盍建不代之功誅其逆
將向潤客牛廷玠拔其根柢祿山西不能入關則坐而受擒天下可
定也循雖善之計不時決事洩祿山果遣韓朝陽來召循朝陽至范
陽與循語陰伏壯士以弓弦縊殺之燧脫身走西山隱者徐遇厓之
踰月間行歸平原平原不守復走魏郡寶應中澤潞節度使李抱玉

署奏趙城尉是時迴紇大軍還國恃復東都之功倔強恣睢所過或虜掠廩粟供餽小不如意恣行殺害抱玉具供辦賓介皆憚不敢行燧自贊請主郵驛比迴紇至則先賂其渠帥與明要約迴紇乃授燧旗幟爲識犯令者命燧戮之燧取死囚給左右廝役小違令輒殺之迴紇相顧失色虜涉其境無敢暴掠抱玉益奇之燧因說抱玉曰屬者與迴紇言燧得其情今僕固懷恩恃功樹黨李懷仙張忠志薛嵩田承嗣分授疆土皆出於懷恩其子瑒佻勇不義以燧度之將必窺太原西山以爲亂公宜深備之無何懷恩果與太原都將李竭誠通謀將取太原其帥辛雲京覺之斬竭誠固城自守懷恩遣其子瑒率兵圍之初迴紇北歸遣其將安恪石常庭將兵數百及誘募附麗者復數千人以守河陽東都所虜掠重貨悉積河陽是時懷恩從順署奏左武衛餽糧以絕河津抱玉令燧詣薛嵩說之嵩乃絕懷恩從順署奏左武衛兵曹歷太子通事舍人遷著作郎營田判官無幾遷秘書少監兼殿中侍御史爲節度判官承務郎遷鄭州刺史燧乃勸課農畝摠其

戶籍歲一稅之州人以爲便大曆四年改懷州刺史乘亂兵之後其
夏大旱人失耕稼燧乃務修教化將吏有父母者燧輒造之施敬收
瘞暴骨去其煩苛至秋界中生穰穀人頗賴之抱玉移鎮鳳翔以汧
陽被邊署秦隴州刺史兼御史中丞州西有通道廣二百餘步上連
峻山山與吐蕃相直虜每入寇皆出於此燧乃按行險易立石種樹
以塞之下置二門設籬櫓八日而功畢會抱玉入覲與燧俱行久之
代宗知其能召見拜商州刺史兼御史中丞防禦水陸運使大曆十
年河陽三城兵亂逐鎮將常休明以燧檢校左散騎常侍御史大夫
河陽三城使十一年五月汴州大將李靈耀反因據州城絕運路以
邀節制代宗務姑息人因授靈耀汴宋等八州節度留後靈耀不受
命乃潛結魏博田承嗣乃遣兄子悅將兵援靈耀破永平軍將劉洽
詔燧與淮西節度使李忠臣合軍討靈耀忠臣懼賊焚廬舍西走燧
勸其還兵請爲前鋒擊破田悅進逼汴州忠臣行汴南燧引軍行汴
北又敗靈耀將張清於西梁固靈耀選銳兵八千號爲餓狼軍燧獨

引軍擊破之進至浚儀是時河陽兵寇諸軍承嗣又遣悅將兵二萬救靈耀破永平軍將杜如江畧曹州又敗李正己遊軍擊走劉洽長孫全緒等軍乘勝去汴州一舍方陣而進忠臣會宋州淮南浙西兵與戰不利請救於燧燧引四千人爲奇兵擊破之田悅匹馬遁去靈耀知悅敗明日以百騎夜走汴州悉降燧讓功於忠臣忠臣素暴戾燧不欲入汴城乃引軍退舍於板橋忠臣入城果專其功因會擊殺宋州刺史李僧惠燧還河陽大曆十四年六月檢校工部尚書太原尹北都留守河東節度畱後尋爲節度使太原承前政鮑防百井敗軍之後兵甲寡弱燧乃悉召將吏牧馬廝役得數千人悉補騎卒教之數月爲精騎造甲者必令長短三等稱其所衣以便進趨又造戰車蒙以狻猊象列戟於後行則載兵甲止則爲營陣或塞險以遏奔衝器械無不犀利居一年陳兵三萬開廣場以習戰陣教其進退坐作之勢建中二年六月朝于京師加檢校兵部尚書令還太原初田悅新代承嗣統兵恐人不附已詐効誠款燧上䟽明其必反宜先備

之其年悅果與淄青恒翼通謀自將兵三萬圍邢州次臨洺築重城絕其內外以拒救兵邢州將李洪臨洺將張仵皆堅守不拔昭義軍告急乃詔燧將步騎二萬與昭義節度使李抱真神策行營兵馬使李晟合軍救臨洺燧軍出嚙口兵未過險乃遣持書喻悅且示之好悅謂燧畏之十一月師次邯鄲悅遣使至燧皆斬之以徇遣兵擊破其支軍射殺其將成炫之悅自攻臨洺遣大將楊朝光將兵萬人於臨洺南雙岡東西列二柵以禦燧燧乃率李抱真李晟進軍營於二柵之中其夜東柵走歸悅明日燧進軍營明山取其棄柵以置輜重悅謂將吏曰朝光堅柵不下萬人假令燧等盡銳攻之比數日計不能下殺傷必甚吾此必拔臨洺賞勞軍士而與之戰必勝之術也悅乃分恒州李惟岳救兵五千以助朝光燧率軍攻朝光田悅將萬餘人救之燧乃令大將李自良李奉國將騎兵合神策軍於雙岡禦之今日令悅得過當斬爾自良等擊却悅燧乃令推火車以焚其柵斬朝光及大將盧子昌斬首五千餘級生虜八百餘人居五日進軍至

臨洛田悅悉軍復戰燧自將銳兵振其衝口凡百餘合士皆決死悅兵大敗斬首萬餘級生虜九百人得穀三十萬斛器甲稱是悅收敗兵夜遁邢州圍亦解以功加右僕射先戰燧誓軍中戰勝請以家財行賞既勝盡出其私財以頒將士德宗嘉之詔度支出錢五萬貫行賞還燧家財尋加魏博招討使三年正月田悅求救於淄青恒異李納遣大將衛俊將兵萬人救悅李惟岳亦遣兵三千赴援悅收合散卒二萬餘人壁于汨水淄青軍其東恒異軍其西首尾相應燧率諸軍進屯於鄴奏請益河陽兵詔河陽節度使李芄將兵會之軍次于漳悅遣將王光進以兵守長橋築月城以爲固軍不得渡燧乃於下流以車數百乘維以鐵鑱鑱絕中流實以土囊以遏水水稍淺諸軍畢渡是時軍糧少悅深壁不戰欲老燧軍燧令諸軍持十日糧進次倉口與悅夾汨水而軍抱真與李芄問曰糧少而深入何也燧曰糧少利速戰兵法善於致人不致於人今田悅與淄青恒三軍爲首尾計欲不戰以老我師若分軍擊其左右兵少未可必破悅且來救是

前後受敵也兵法所謂攻其必救彼固當戰也燧爲諸軍合而破之
燧乃造三橋道逾汨水日挑戰悅不敢出恒州兵以軍少懼爲燧所
并引軍合於悅悅謂燧明日復挑戰乃伏兵萬人欲邀燧燧乃令諸
軍半夜皆食先雞鳴時擊鼓吹角潛師傍汨水徑趨魏州令曰聞賊
至則止爲陣又令百騎吹鼓角皆留於後仍抱薪持火待軍畢發止
鼓角匿其旁伺悅軍畢渡焚其橋軍行十數里悅乃率淄青恒州步
騎四萬餘人踰橋掩其後乘風縱火鼓譟而進燧乃坐申令無動命
前除草斬榛棘廣百步以爲陣燧出陣募勇力得五千餘人分爲前
列以俟賊至比悅軍至則火止氣乏力少衰乃縱兵擊之悅軍大敗
時神策昭義河陽軍小却河東軍旣勝諸軍還關合擊又大破之迫
汨水悅軍走橋橋已焚矣悅軍亂赴水斬首二萬餘級殺大將孫晉
卿安墨啜生獲三千餘人溺死者不可勝紀淄青軍殆盡死者相枕
藉三十餘里悅收敗卒千餘人走魏州至門州將李長春閉門不納
久之追兵不至比明乃納悅悅旣入殺長春嬰城自守數日李再春

以博州降悅兄昂以洺州降王光進以長橋降悅遣符璘李瑤將五百騎送淄青兵還鎮璘瑤因來降燧魏州先引御河入南流燧令塞其領口河流絕城中益恐悅乃遣許士則侯臧徒步間行說朱滔王武俊借兵求救時王武俊已殺李惟岳傳首京師授武俊恒冀觀察都防禦使時武俊同列張孝忠已爲易定節度使武俊獨爲防禦使又割趙深二州爲一鎮以康日知爲觀察使甚爲怨望且素輕孝忠恥名在下時朱滔討李惟岳拔深州求隸幽州不得亦怨望由是滔武俊同謀救悅悅恃燕趙之援又出兵二萬背城而陣燧復與諸軍擊破之五月加燧同中書門下平章事六月朱滔王武俊聯兵五萬來救悅至于城下諸帥議退兵燧固不可德宗遣朔方節度使李懷光將朔方軍步騎萬五千人赴燧是月晦懷光亦至懷光勇而無謀軍至之日未休息堅請與滔等戰王師不利悅等決水灌燧等軍燧兵屈糧少七日燧與諸軍退次魏縣是月詔加燧魏州大都督府長史兼魏博貝四州節度觀察招討等使田悅朱滔王武俊軍亦至魏

縣與官軍隔河對壘十一月三盜於魏縣軍中遞相推獎王號朱滔
稱異王田悅稱魏王王武俊稱趙王又遣使於李納納稱齊王四道
共推淮西李希烈爲天下兵馬元帥太尉建興王皆僞署官號如國
初行臺之制而名目頗有妖僻者然未敢僞稱年號而五盜合從圖
傾社稷兩河鼎沸寇盜橫行燧等雖志在勤王竟莫能毆數患難四
年十月涇師犯闕帝幸奉天燧引軍還太原議者云燧若乘田悅汨
水之敗併力攻之時城中敗卒無三二千人皆夷傷未起日夕俟降
燧與抱真不和遷延於擊賊乃致三盜連結至今爲梗職燧之由燧
至太原遣行軍司馬王權將兵五千赴奉天又遣男彙及大將之子
與俱來壁於中渭橋及帝幸梁州權彙領兵還鎮燧以晉陽王業所
起度都城東面平易受敵時天下騷動北邊數有警急乃引晉水架
汾而注城之東渚以爲池寇至計省守陴者萬人又決汾水環城多
爲池沼樹柳以固隄尋兼保寧軍節度使興元元年正月加檢校司
徒封北平郡王七月德宗還京加燧奉誠軍及晉絳慈隰節度并管

內諸軍行營副元帥令與侍中渾瑊鎮國軍節度使駱元光同討河中初李懷光據河中燧遣使招諭之懷光妹壻要廷珍守晉州衙將毛朝敷守隰州鄭抗守慈州皆相次降燧初王武俊自魏縣還鎮雖去僞號而攻圍趙州不解康日知窘蹙欲棄趙州燧奏曰可詔武俊與抱真同擊朱滔以深趙隸武俊請改日知爲晉慈隰節度使日知未至而三州降燧故又加燧晉慈隰節度使燧乃表讓三州於日知且言因降而援之恐後有功者踵以爲常上嘉而許之燧乃遣使迎日知既至籍府庫而歸之日知喜且過望九月十五日燧帥步騎三萬次千絳分兵收夏縣略稷山攻龍門降其將馮萬興任象玉燧以兵攻絳州十月拔其外城其夜僞刺史王克同與大將達奚小進棄城走降其衆四千人又遣大將李自良谷秀分兵畧定聞喜夏縣萬泉虞鄉永樂猗氏六縣降其將辛兢及兵五千人谷秀以犯令虜士女斬之以徇貞元元年軍次寶鼎敗賊騎兵於陶城前鋒將李黯追擊之射殺賊將徐伯文斬首萬餘級獲馬伍百匹是歲天下蝗旱物

價騰踊軍乏糧餉而京師言事多請捨懷光上意未決燧以懷光逆節尤甚河中密邇京邑反覆不可保信捨之無以示天下慮上爲左右所惑且兵事尚密六月燧乃捨軍以數百騎朝于京師比召見燧曰臣雖不武得蒞糧支一月足以平河中上許之七月燧因朝京師乃與渾瑊駱元光韓遊瓌合軍次于長春宮懷光將徐廷光以兵六千守宮城禦備甚嚴燧度長春不下則懷光自固攻之曠日持久所傷必甚乃挺身至城下呼廷光廷光素憚燧威名則拜於城上燧度廷光心已屈乃徐謂之曰我來自朝廷可西面受命廷光復拜燧乃喻之曰公等皆朔方將士祿山已來首建大勲四十餘年功伐最高奈何棄祖父之勲力背君上爲族滅之計耶從吾非止免禍富貴可圖也賊徒皆不對燧又曰爾以吾言不誠今相去不遠數步爾當射我乃披襟示之廷光感泣俯伏軍士亦泣下先一日賊焦籬堡守將尉珪以兵二千因堡降燧廷光東道旣絕乃率衆出降燧以數騎徑入城處之不疑莫不畏服衆大呼曰吾輩復得爲王人矣渾瑊繇是

服燧私謂叅佐曰予嘗謂馬公用兵與予不相遠但驚恠累敗田悅
今觀其行兵料敵吾不迨遠矣八月燧移軍於焦籬堡其夜賊太原
堡守將吳罔棄堡而遁其下皆降燧率諸軍濟河兵凡八萬陣於城
下是日賊將牛名俊斬懷光首以城降其守兵猶一萬六千人斬賊
將閻晏孟寶張清吳罔等七人以徇爲懷光脅虜者皆捨之燧自朝
京師還行營凡二十七日而河中平詔書褒美遷光祿大夫兼侍中
仍與一子五品正貲官宴賜畢還太原是行也德宗賜燧宸展台衡
二銘序曰朕每覽上古之書及唐虞之際君臣相得聖賢同時日夕
孜孜講論至道或陳其鑒誡或諷以詠歌煥乎典謨百代是式有以
見啓沃之道理化之端意甚慕之而未能追也頃靈鹽節度使杜希
全著書上獻多所規諫聊爲君臣箴用荅其意河東等道副元帥司
徒燧固請勒石貽厥後人朕以文旣非工義又非備垂諸來裔良所
慙焉起予者商因之有作庶乎朝夕自儆且俾後代知我文武殿邦
之臣歟宸展銘曰天生蒸人性命元淳嗜欲交馳利害糾紛無主乃

亂樹之以君九域茫茫萬情云云目不備覩耳難徧聞覩之聞之矧
又非眞事失其源道遠莫親理得其要化行如神失源維何不自正
身正身之方先誠其意罔從爾欲罔載爾僞體道崇德本仁率義必
信若寒暑無私象天地感而遂通百慮一致任人之術各當其器捨
短從長理無求備事多摠集衆才咸遂知而必任任而勿貳以天下
之目爲鑒我鑒斯明以天下之心爲謀我謀則智求賢惟廣辯理惟
精逆耳拂心必嘉乃誠順旨苟容亦察其情斥去姦諛全度忠貞先
人立言爲代作程諤諤者昌唯唯者傾繫以興二曷云其輕承天子
人夫豈不貴伊昔哲王夙夜祗畏馭朽爲戒納隍爲志神將害盈天
匪假易四海爲家夫豈不富伊昔哲王勤儉固陋土階罔飾露臺罷
構遠竒伎淫巧放珍禽怪獸敬之慎之天命可祐欲令必行順人之
情欲誠必著清已之慮心無億詐事必忠恕凡將有爲靡不三思喜
怒以節動靜以時毫釐或差禍害亦隨慢易厥初悔其曷追刑不可
長武不可恃作威逞力厲階斯起垂旒蔽聰黠纒塞耳含弘光大是

亦爲美覆之如天愛之如子仁心感人率土自理嗟予寡昧嗣守丕
圖寇戎荐興德化未孚大業兢兢其敢以渝俯察物情仰稽典謨作
誠斯言寘于坐隅台衡銘曰天列台星垂象于人聖人則天亦建輔
臣以翼以弼爲衡爲鈞如耳目應心如股肱運身是則同體孰云非
親陰陽相推四序成歲君臣相得萬邦作乂感同風雲合若符契以
道匡救盡規獻替木必從繩金其用礪帝者之盛時惟陶唐乃聞疇
咨仄陋明敷洎乎有虞二八騰芳爰迨伊尹相于成湯載生姜牙諒
彼武王道無不行謀無不臧君聖臣賢運泰時康漢高旣興蕭曹亦
彰烈烈我祖膺期而昌剋滅羣兇砥平四方惟衛及英啓闢封疆曰
房與杜振理維綱亦有魏徵忠謇昂偉茲衆材爲棟爲梁蕩蕩巍巍
巍邦家有光是知道之廢興繫于時主主之得失資于台輔經之以
文緯之以武出爲方伯入作申甫絕維載張闕袞斯補惟德是倚惟
才是求人不易知德亦難周傳說板築夷吾射鉤任之不疑千載垂
休體於至公何鄙何讎追惟哲主必賴良弼矧予不德暗於理術師

旅繁起政刑多失遘茲艱屯夙夜祇慄翊我戴我實惟勲賢內熙廢績外摠十連威武載揚謀猷日宣長城堅境巨艦齊川同德同心扶危持顛予嘉爾誠爾相予理惟后失道亦臣之耻自昔格言慎終如始功藏鼎彝道冠圖史無俾伊傳克專厥美作鑒勒銘永世是紀燧至太原乃勒二銘於起義堂西偏帝爲題額其崇寵如此二年冬吐蕃大將尚結贊陷鹽夏二州各留兵守之結贊大軍屯於鳴沙自冬及春羊馬多死糧餉不繼德宗以燧爲綏銀麟勝招討使令與華帥駱元光邠帥韓遊瓌及鳳翔諸鎮之師會於河西進討燧出師次石州結贊聞之懼遣使請和仍約盟會上皆不許又遣其大將論頰熟厚禮卑辭申情於燧請和燧頻表論奏上堅不許三年正月燧軍還太原四月燧與論頰熟俱入朝燧盛言蕃情可保請許其盟上然之燧旣入朝結贊遽自鳴沙還蕃是歲閏五月十五日侍中渾瑊與蕃相尚結贊盟于平涼爲蕃軍所劫狼狽僅免陷將吏六十餘員由燧之謬謀也坐是奪兵權六月以燧守司徒兼侍中北平王如故仍賜

妓樂奉朝請而已五年九月燧與太尉李晟召見于延英殿上嘉其
有大勲力皆圖形凌煙閣列於元臣之次九年七月燧對於延英初
上以燧足疾不令朝謁是日燧以冬首入朝勅許不拜而坐時太尉
晟初薨帝謂燧曰常時卿與太尉晟同來今獨見卿不覺悲慟上歔
歔久之燧既退足疾仆於地上親掖起之送及於陞燧頓首泣謝累
上表乞骸陳讓侍中優詔不許貞元十一年八月薨時年七十先是
司天頻奏熒惑太白犯太微上將間一月而燧薨廢朝四日詔京兆
尹韓臯監護喪事嗣吳王獻爲弔祭贈賻使冊贈大尉謚曰莊武
史臣曰燧雄勇強力常先計後戰又善誓師將戰親自號令士無不
慷慨感動戰皆決死未嘗折北謀得兵勝冠於一時然力能擒田悅
而不取納蕃帥之僞款而保其必盟平涼之會大臣幾陷關畿搖動
此謂才有餘而心不至議者惜而恨之

子彙暢暢以父蔭累遷至鴻臚少卿畱京師建中三年燧討田悅於
山東時歲旱京師括率商戶人心甚搖鳳翔畱鎮幽州兵多離散入

南山爲盜殿中丞李雲端與其黨袁封單超俊李誠信異信等與暢善因飲食聚會言時事將危暢乃遣家人溫靖與父書具陳利害可班師還鎮燧怒執靖具奏其狀令兄炫執暢請罪德宗以燧方討賊不竟其事誅雲端等十一人勅炫就第杖暢三十上於是罷括率之令燧貲貨甲天下燧旣卒暢承舊業屢爲豪幸邀取貞元末中尉申志廉諷暢令獻田園第宅順宗復賜暢初爲彙妻所訴析其產中貴又逼取仍指使施於佛寺暢不敢忝晚年財產並盡身歿之後諸子無室可居以至凍餒今奉誠園亭館卽暢舊第也暢終少府監贈工部尚書子繼祖以祖蔭四歲爲太子舍人累遷至殿中少監年三十卒

馬炫字弱翁燧之仲兄少以儒學聞於時隱居蘇門山不應辟召至德中李光弼鎮太原辟爲掌書記試大理評事監察御史歷侍御史常叅謀議光弼甚重之奏授比部刑部郎中田神功鎮汴州奏授節度判官檢校兵部郎中轉連州刺史徵拜吏部郎中又出爲閬州刺

史入爲大理少卿建中初爲潤州刺史黜陟使柳載以清白聞徵拜太子右庶子遷左散騎常侍弟燧爲司徒以親比拜刑部侍郎以疾辭改兵部尚書致仕貞元七年卒時年七十九

渾瑊，隴州人也。本鐵勒九姓部落之渾部也。高祖大俟利發渾阿貪支貞觀中爲隴州刺史，曾祖元慶祖大壽父釋之皆代爲隴州都督。大壽開元初歷左領衛中郎將，太子僕同正釋之少有武藝，從朔方軍積戰功於邊上，累遷至開府儀同三司，試太常卿，寧朔郡王。廣德中與吐蕃戰沒於靈武，年四十九。瑊本名曰進，年十餘歲，即善騎射，隨父戰伐，破賀魯部下石堡城，收龍駒島，勇冠諸軍，累授折衝果毅，後節度使安思順遣瑊提偏師深入葛祿部，經狐媚磧，略特羅斯山大破阿不思部，又與諸軍城永清柵，天安軍遷中郎將，安祿山構逆，瑊從李光弼出師河北，定諸郡邑，賊將有李立節者，素稱驍勇，與瑊格鬪，臨陣斬之，遷右驍衛將軍。旣而肅宗卽位於靈武，瑊統兵赴行在，至天德遇蕃軍入寇，瑊擊敗之，從郭子儀收兩京，討安慶緒。

破賊於新鄉改檢校太僕卿充武鋒軍使又從僕固懷恩討史朝義前後數十戰朝義平加開府儀同三司太常卿賜實封二百戶及懷恩謀亂令子瑒與城率軍圍榆次朔方將殺瑒城率所部歸郭子儀會城父釋之戰死又起復本官爲朔方行營左廂兵馬使從子儀討吐蕃於邠州以功加御史中丞軍還盛秋於邠會吐蕃大入寇至奉天城拒戰於莫谷大破蕃軍以功加太子賓客復屯於奉天華州周智光反子儀奉詔討之令城領馬步萬人攻下同州智光平詔以邠寧慶三州隸朔方軍子儀領之子儀令城先率兵至邠州便於宜祿縣防秋歲餘加兼御史大夫大曆七年吐蕃大寇邊城與涇原節度使馬璘會兵大破蕃賊於黃菩原自是每年常戍於長武城臨盛秋十一年領邠州刺史其年吐蕃入寇慶州方渠懷安等鎮城擊却之十二年子儀入朝令城知邠寧慶三州兵馬留後十三年迴紇侵太原破鮑防軍北歸頗爲邊患以城爲石嶺關已南諸軍都知兵馬使率兵犄角逐之虜騎引退其年八月加檢校工部尚書單于副都護

振武軍使十四年郭子儀拜太尉號尚父分所管內別置三節度以
城兼單于大都護充振武軍東受降城鎮北大都護府綏銀麟勝等
軍州事節度副大使知節度使事管內支度營田等使其年復以崔
寧爲朔方節度使領子儀舊管徵城爲左金吾衛大將軍兼左街使
建中四年李希烈遣間諜詐爲城書與希烈交通城奏其狀上特保
證之仍賜城馬一匹并鞍轡錦綵二百匹時以普王爲荆襄等道兵
馬元帥討李希烈大開府幕以城檢校戶部尚書御史大夫充中軍
都虞候會涇師亂德宗幸奉天後三日城率家人子弟自京城至乃
署爲行在都虞候檢校兵部尚書京畿渭北節度觀察使居數日邠
寧節度使韓遊瓌與慶州刺史論惟明統兵三千自乾陵北過醴
泉以拒朱泚會諜報泚已出兵帝遽令追遊瓌兵纔至奉天賊軍果
至遊瓌等戰于城東王師不利遂乘勝奔突將入官軍與賊隔門相
持自卯至午殺傷頗甚門內有草車數乘城令推車塞門焚之以外
禦乘火力戰賊方解去然重圍已合賊大修攻具以僧法堅爲匠師

毀佛寺房宇以爲梯櫓是月賊自丁未至辛未四面攻城晝夜矢石不絕城隨機應敵僅能自固十一月靈武節度使杜希全鹽州刺史戴休顏夏州刺史常春合兵六千人赴難將至上議其所向宰相盧杞白志貞以漠谷路爲便城曰漠谷險隘必爲賊所邀若取乾陵北過附使城守固而行便取城東北鷄子堆下與城中犄角相應且分賊勢朱泚必不更於陵寢往來杞曰漠谷路近若慮逆賊邀擊即出兵應接若取乾陵路恐驚陵寢城曰今朱泚圍城斬伐柏城以夜繼晝驚動已多今城中危急佇望救軍唯希全等率先赴難安危是賴所繫非輕制置不宜差跌但令希全等於鷄子堆下營固守善地賊泚可以計破也盧杞等曰陛下以順討逆不可自驚陵寢曰志貞從而贊之上從杞議希全等進至漠谷果爲賊軍邀擊奪據水口乘高以大弩巨石左右夾擊殺傷頗甚城中出兵應援亦爲賊挫銳而退希全等各歸還本鎮賊攻城逾急壕塹圯之旬日復偏攻東北角矢石亂入晝夜如雨城中死傷者甚衆重圍救絕芻粟俱盡城中伺賊

休息輒遣人城外拮拾樵採以進御人心危蹙上與城對泣賊泚北據乾陵下瞰城內身衣黃衣蔽以翟扇前後左右皆朱紫閣官宴賜拜舞紛紜旁午城中動息賊俯窺之慢辭戲侮以爲破在漏刻之頃時令騎將環城招公卿士庶責以不識天命十五日賊造雲橋成闊數十丈以巨輪爲脚推之使前施濕氈生牛革多懸水囊以爲障直指城東北隅兩旁構木爲廬冒以牛革迴環相屬負土運薪於其下以填壕塹矢石不能傷城中恟懼相顧失色上召城勦諭之令齋空名告身自御史大夫實封五百戶已下者千餘軸募諸軍突將敢死之士以當之兼賜城御筆一管當戰勝量其功伐即署其名授之不足者筆書其身因命以位仍謂城曰朕便與卿別更不用對來縱有急切令馬承倩在卿處但令附奏城俯伏嗚咽上亦悲慟不自勝撫城背而遣之前一日城與防城使侯仲莊揣雲橋來路先鑿地道下可深丈餘上積馬糞深五六尺次二日即令焚火次一日復下柴薪夜燒之平明火焰高於城壘是時北風正急賊乃隨風推橋以薄城

下賊三千餘人相繼而登城上士卒皆久寒餒又少甲冑城但感激誠厲之以飢弱之衆當劇賊之鋒雖力戰應敵人憂不濟公卿已下仰首祝天賊徒至地道所橋脚偏陷不能進須臾風迴焰轉雲橋焚爲灰燼賊焚死者數千城中歡譟振地時城中流矢遽自拔之血流霑沫格鬪不已初不言瘡痛以激士心是日上先授賊二子官餘授將校有差賊又別造雲橋周以重鐵方就而朔方節度使李懷光自魏縣行營赴難先遣兵馬使張韶入奏韶至奉天與賊填塹者相雜臨城忽大呼謂城上曰我李懷光使也懷光自河北領大軍至矣即繩引而登城中得懷光表歡聲振動賊衆不之測乃令昇韶巡於城上翌日懷光大軍次醴泉是夜賊解圍而去興元元年正月以瑊爲行在都知兵馬使二月賜實封五百戶是月德宗移幸山南時懷光叛逆二賊連結寇盜縱橫城分布諸軍以爲翼衛繞入谷口而懷光追騎遽至瑊令侯仲莊以後軍擊敗之三月加檢校左僕射同中書門下平章事兼靈州都督靈鹽豐夏等州定遠西城天德軍節度等

使仍充朔方鄜寧振武等道兼永平軍奉天行營兵馬副元帥上臨
軒授鉞用漢拜韓信故事是月賊將諸軍赴京畿賊將韓旻張廷芝
宋歸朝等拒我師於武功賊與吐蕃將論莽羅之衆大破賊於武亭
川斬首萬餘級賊便赴奉天應接李晟抗京城西面五月李晟自東
渭橋抵京城攻賊賊亦與韓遊瓌戴休顏西面諸軍會合晟破賊之
日賊亦進收咸陽尋聞朱泚姚令言奔敗命諸軍分道邀擊其衆離
潰相率來降選勁騎三千急追泚至涇州賊將誅泚傳首來獻六月
加賊侍中論收京城之功加實封李晟一千戶賊八百戶韓遊瓌戴
休顏四百戶駱元光尚可孤五百戶七月德宗還宮以賊守本官兼
河中尹河中絳慈隰節度使仍充河中同陝虢節度及管内諸軍行
營兵馬副元帥改封咸寧郡王九月賜賊大寧里甲第女樂五人入
第之日宰臣節將送之一如李晟入第之儀以李懷光未平又加朔
方行營兵馬副元帥與河東節度使馬燧會兵進討貞元元年八月
河中平以功加檢校司空與一子五品正貲官是冬望皇帝親郊昊

天上帝城入朝陪祀畢還鎮河中三年吐蕃入寇至鳳翔爲李晟邀擊之又襲破其摧沙堡吐蕃深恨之尚結贊入寇陷我鹽夏二州以兵守之欲長驅犯京師而畏城與李晟馬燧欲陰計圖之乃卑詞遜禮告馬燧請重立盟誓則蕃軍引去德宗不許馬燧自入朝言之上乃令崔翰入蕃報結贊言還我鹽夏則許同盟結贊謂翰曰清水之會同盟人少是以和好輕慢不成今蕃相及元帥已下凡二十一人赴盟靈州節度使杜希全涇原節度使李觀皆和善守信境外重之此時須請預盟翰約盟于清水且先歸我鹽夏二州結贊曰清水非吉地請會盟於原州土梨樹又請盟畢歸二州翰歸備奏其事神策將馬有麟奏曰土梨樹地多險恐蕃軍隱伏不利不如於平涼其地坦平且近涇州就之爲便乃定盟於平涼川初結贊請李觀杜希全預盟欲執之徑犯京師詔報之曰杜希全職在靈州不可出境李觀又已改官今遣侍中渾瑊充盟會使五月瑊自咸陽入朝詔授平涼盟會使兵部尚書崔漢衡副之司勳郎中鄭叔矩爲判官瑊統兵二

萬又詔華州節度使駱元光以本鎮兵從城閏月十五日城與結贊會平涼初約以兵三千列於壇之東西散手四百人至壇下各遣遊軍相胡伺是時蕃軍精騎數萬列於壇西蕃之遊軍貫穿我軍之中城將梁奉貞率六十騎爲遊軍纔至壇所爲蕃軍所執結贊又謂城曰請侍中已下具衣冠劔珮城與監軍宋鳳朝崔漢衡等入幕次坦無他慮結贊命伐鼓三通其衆呼譟而至城遽出自幕後偶得他馬跨而奔馳追騎雲合流矢雨集而不傷會城將辛榮以數百人據北阜與賊血戰追騎方止城僅得免辛榮兵盡矢窮力屈而降宋鳳朝城判官鄭弁爲追兵所殺崔漢衡中官俱文珍劉延李清朝漢衡判官鄭叔矩城判官路泌袁同直大將軍扶餘準馬寧神策將孟日華李至言樂演明范澄馬弁等六十餘人皆陷于賊尚結贊至原州列坐帳中召陷蕃將吏讓之因怒城曰武功之捷吐蕃之力許以涇州靈州相報竟食其言負我深矣舉國同怨本却是盟志在擒城吾已爲金枷待城將獻贊普既已失之虛致君等何爲乃放俱文珍馬寧

馬奔歸朝七月城自奉天入朝素服待罪詔釋之而後見俄而吐蕃
入寇京畿城鎮奉天十月還河中四年七月加邠寧慶副元帥十二
年二月加檢校司徒兼中書令諸使副元帥如故十五年十二月二
日薨於鎮廢朝五日羣臣於延英奉慰詔贈太師謚曰忠武賻絹布
四千匹米粟三千碩及喪車將至又爲廢朝應緣喪事所司準式支
給命京兆尹監護葬日賜絹五百匹城忠勤謹慎功高不伐在藩方
歲時貢奉必躬親閱視每有頒錫雖居遠地如在帝前位極將相無
忘謙抑物論方之金日磾故深爲德宗委信猜間不能入君子多之
子鍊鎬鐵

鎬城第二子性謙謹多與士大夫遊歷延唐二州刺史軍政吏職有
可稱者及元和中諸道出師討王承宗屬義武軍節度使任迪簡病
不能軍以鎬藉父威名足以鎮定乃以鎬檢校右散騎常侍充義武
軍節度副使九月六日加檢校工部尚書代迪簡爲節度使鎬治兵
練卒頗有威望然不能觀釁養銳以期必勝鎮定相去九十里元和

十一年冬鎬率全師墜賊境而軍距賊壘三十里鎬謀慮不周但耀兵鋒無所控制賊乃分兵潛入定州界焚燒驅掠鎬怒進攻賊壘交鋒而敗師徒殆喪其半餘衆還定州亂不可遏朝廷乃除陳楚代之楚聞亂馳入定州鎬爲亂兵所劫以至保露楚旣整戢於亂兵處率歛衣服還鎬方得歸朝坐貶韶州刺史後代州刺史韓重華奏收得鎬供軍錢絹十餘萬貫匹再貶循州刺史歲餘卒鐵城第三子以父蔭起家爲諸衛叅軍歷諸衛將軍元和初出爲豐州刺史天德軍使坐賊貶袁州司戶憲宗思咸寧之勲北例從輕五年徵爲袁王傳復賜金紫遷殿中監開成初宰相擬壽州刺史文宗曰鐵勲臣子弟豈可委以牧民仲尼有言不如多與之邑今我念其先人之功與之致富可也宰臣曰鐵常歷名郡有政能乃從之三年入爲右金吾衛大將軍知街事歷諸衛大將軍卒

史臣曰馬司徒之方畧渾咸寧之忠藎各奮節義爲時名臣然元城之師失策於田悅平涼之會幾陷於吐蕃此亦術有所不至也緬思

建中之亂四海波騰賊泚竊發之辰宗祀不絕如綫苟非忠臣致命
化危爲安則李氏之宗社傾矣
贊曰北平之勲排難解紛咸寧蹈義感慨匡君再隆基構克殄昏氛
迴天捧日實賴將軍

唐傳列傳卷第八十四

唐書列傳第八十五

劉 昫 等修

聞人詮校刻沈桐岡校

盧杞 杞子元輔

白志貞

裴延齡

韋渠牟

李齊運

李實

韋執誼

王叔文 王伾附

程异

皇甫鏞 鏞弟鏞

盧杞字子良故相懷慎之孫父奕天寶末爲東臺御史中丞洛城爲安祿山所陷奕守司而遇害杞以門蔭解褐清道率府兵曹朔方節度使僕固懷恩辟爲掌書記試大理評事監察御史以病免入補鴻臚丞遷殿中侍御史膳部員外郎出爲忠州刺史至荆南謁節度使衛伯玉伯玉不悅杞移病歸京師歷刑部員外郎金部吏部二郎中杞貌陋而色如藍人皆鬼視之不恥惡衣糲食人以爲能嗣懷慎之

清節亦未識其心頗有口辯出爲虢州刺史建中初徵爲御史中丞
時尚父子儀病百官造問皆不屏姬侍及聞杞至子儀悉令屏去獨
隱机以待之杞去家人問其故子儀曰杞形陋而心險左右見之必
笑若此人得權即吾族無類矣及居紂彈顧問之地論奏稱旨遷御
史大夫旬日爲門下侍郎同中書門下平章事既居相位忌能妬賢
迎吠陰害小不附者必致之於死將起勢立威以久其權楊炎以杞
陋兒無識同處台司心甚不悅爲杞所譖逐於崖州德宗幸奉天崔
寧流涕論時事杞聞惡之譖於德宗言寧與朱泚盟誓故至遲廻寧
遂見殺惡顏真卿之直言令奉使李希烈竟歿於賊初京兆尹嚴郢
與楊炎有隙杞乃擢郢爲御史大夫以傾炎炎既貶死心又惡郢圖
欲去之宰相張鑑忠正有才上所委信杞頗惡之會朱泚朱泚弟兄
不睦有泚判官蔡廷玉者離間滔滔論奏請殺之廷玉旣貶殿中侍
御史鄭詹遣吏監送廷玉投水而卒杞因奏曰恐朱泚疑爲詔旨請
三司按鞠詹又御史所爲稟大夫命并令按郢詹與張鑑善每伺杞

晝眠輒詣鎰杞知之他日杞假寢佯熟伺詹果來方與鎰語杞遽至鎰閣中詹趨避杞杞遽言密事鎰曰殿中鄭侍御在此杞佯愕曰向者所言非他人所宜聞時三司使方按詹郢獄未具而奏殺詹貶郢爲驩州刺史鎰尋罷相出鎮鳳翔其陰禍賊物如此李揆舊德慮德宗復用乃遣使西蕃天下無不扼腕痛憤然無敢言者戶部侍郎判度支杜佑甚承恩顧爲杞媒孽貶饒州刺史初上即位擢崔祐甫爲相頗用道德寬大以弘上意故建中初政聲譴然海內想望貞觀之理及杞爲相諷上以刑名整齊天下初李希烈請討梁崇義崇義誅而希烈叛盡據淮右襄鄧之郡邑恒州李寶臣死其子惟岳邀節鉞遂與田悅締結以抗王師繇是河北河南連兵不息度支使杜佑計諸道用軍月費一百餘萬貫京師帑廩不支數月且得五百萬貫可支半歲則用兵濟矣杞乃以戶部侍郎趙贊判度支贊亦計無所施乃與其黨太常博士韋都賓等謀行括率以爲泉貨所聚在於富商錢出萬貫者留萬貫爲業有餘官借以給軍翼得五百萬貫上許之

約以罷兵後以公錢還勅既下京兆少尹韋禎督責頗峻長安尉薛
萃荷校乘車搜人財貨意其不實即行榜箠人不勝冤痛或有自縊
而死者京師囂然如被賊盜都計富戶田宅奴婢等估纔及八十八
萬貫文以儻櫃納質積錢貨貯粟麥等一切借四分之一封其櫃窖
長安爲之罷市百姓相率千萬衆邀宰相於道訴之杞初雖慰諭後
無以遏即疾驅而歸計儻質與借商纔二百萬貫德宗知下民流怨
詔皆罷之然宿師在野日須供饋明年六月趙贊又請稅間架筭除
陌凡屋兩架爲一間分爲三等上等每間二千中等一千下等五百
所由吏秉筆執籌入人第舍而計之凡沒一間杖六十告者賞錢五
十貫文除陌法天下公私給與貿易率一貫舊筭二十益加筭爲五
十給與物或兩換者約錢爲率筭之市主人牙子各給印紙人有買
賣隨自署記翌日合筭之有自貿易不用市牙子者驗其私簿投狀
自其有私簿投狀其有隱錢百沒入二千杖六十告者賞錢十千出
於其家法旣行主人市牙得專其柄率多隱盜公家所入百不得半

怨黷之聲囂然滿於天下及十月涇師犯闕亂兵呼於市曰不奪汝
商戶僦質矣不稅汝間架除陌矣是時人心愁怨涇師乘間謀亂奉
天之奔播職杞之由故天下無賢不肖視杞如讎德宗在奉天爲朱
泚攻圍李懷光自魏縣赴難或謂王翊趙贊曰懷光累歎憤欲以爲
宰相謀議乖方度支賦歛煩重京尹刻薄軍糧乘輿播遷三臣之罪
也今懷光勲業崇重聖上必開襟布誠詢問得失使其言入豈不殆
哉翊贊白於杞杞大駭懼從容奏曰懷光勲業宗社是賴臣聞賊徒
破膽皆無守心若因其兵威可以一舉破賊今若許其朝覲則必賜
宴賜宴則留連使賊得京城則從容完備恐難圖之不如使懷光乘
勝進收京城破竹之勢不可失也帝然之乃詔懷光率衆屯便橋克
期齊進懷光大怒遂謀異志德宗方悟爲杞所構物議喧騰歸咎於
杞乃貶爲新州司馬白志貞恩州司馬趙贊爲播州司馬遇赦移吉
州長史在貶所謂人曰吾必再入用是日上果用杞爲饒州刺史給
事中袁高宿直當草杞制遂執以謁宰相盧翰劉從一曰杞作相三

年矯誣陰賊排斥忠良朋附者歔唾立至青雲睚眦者顧盼已擠溝壑傲很背德反亂天常播越鑾輿瘡痍天下皆杞之爲也幸免誅戮唯示貶黜尋以稍遷近地更授大郡恐失天下望惟相公執奏之事尚可救翰從一不悅遂改命舍人草制明日詔下素高執奏曰盧杞爲政極恣兇惡三軍將校願食其肉百辟卿士嫉之若讎諫官趙需裴佖宇文炫盧景亮張薦等上疏曰伏以吉州長史盧杞外矯儉簡內藏奸邪三年擅權百揆失序惡直醜正亂國殄人天地神祇所知蠻夷華夏同棄伏惟故事皆得上聞自杞爲相要官大臣動踰月不敢奏聞百寮惴惴常懼顛危及京邑傾淪皇輿播越陛下炳然覺悟出棄遐荒制曰忠謹壅於上聞朝野爲之側目由是忠良激勸內外歡忻今復用爲饒州刺史衆情失望皆謂非宜臣聞君之所以臨萬姓者政也萬姓之所以戴君者心也儻加巨奸之寵必失萬姓之心乞迴聖慈遽輟新命疏奏不荅諫官又論曰盧杞蒙蔽天聽嚆素朝典致亂危國職杞之由可謂公私巨蠹中外棄物目聞再加擢用忠

良痛骨士庶寒心臣昨者瀝肝上聞冒死不畏兇迴宸睠用快群情
至今拳拳未奉聖旨物議騰沸行路驚嗟人之無良一至於此伏乞
俯從衆望永弃奸臣幸免誅夷足明恩貸特加榮寵恐造禍階臣等
忝列諫司今陳狂瞽給事中袁高堅執不下乃改授澧州別駕翌日
延英上謂宰臣曰朕欲授杞一小州刺史可乎李勉對曰陛下授杞
大郡亦可其如兆庶失望何上曰衆人論杞奸邪朕何不知勉曰盧
杞奸邪天下人皆知唯陛下不知此所以爲奸邪也德宗默然良久
散騎常侍李泌復對上曰盧杞之事朕已可袁高所奏如何泌拜而
言曰累日外人竊議以陛下同漢之桓靈臣今親承聖旨乃知堯舜
之不迨也德宗大悅慰勉之杞尋卒於澧州子元輔字子望少以清
行聞於時進士擢第授崇文館校書郎德宗思杞不已乃求其後特
恩拜左拾遺再遷左司員外郎歷杭常絳三州刺史以課最高徵爲
吏部郎中遷給事中改刑部侍郎自兵部侍郎出爲華州刺史潼關
防禦鎮國軍等使復爲兵部侍郎元輔自祖至曾以名節著於史冊

元輔簡絜貞方綽繼門風歷踐清貫人亦不以父之醜行爲累人士
歸美大和三年八月卒時年五十六

白志貞者太原人本名琇珪出於胥吏事節度使李光弼小心勤恪
動多計數光弼深委信之帳中之事與琇珪參決代宗素知之光弼
薨後用爲司農少卿遷太卿在寺十餘年德宗嘗召見與語引爲腹
心遂用爲神策軍使檢校左散騎常侍兼御史大夫賜名志貞善伺
候上意言無不從建中四年李希烈陷汝州命志貞爲京城招募使
時尚父子儀婚端王傳吳仲孺家財巨萬以國家招募有急懼不自
安乃上表請以子弟率奴客從軍德宗嘉之超授五品官由是志貞
請令節度觀察團練等使并嘗爲是官者令家出子弟甲馬從軍亦
與其男官是時豪家不肖子幸之貧而有知者苦之自是京師人心
搖震不保家室時禁軍募致悉委志貞兩軍應赴京師殺傷殆盡都
不奏聞皆以京師沽販之徒以填其闕其人皆在市廛及涇師犯闕
詔志貞以神策軍拒賊無人至者上無以禦寇乃圖出幸時令狐建

以龍武軍四百人從駕至奉天仍以志貞爲行在都知兵馬使聞李懷光至恐暴揚其罪乃與盧杞同沮懷光入朝衆議喧沸言致播遷盧杞志貞之罪也故與杞同貶遇赦量移閬州別駕貞元二年遷果州刺史宰臣李勉及諫官表疏論列言志貞與盧杞罪均未宜叙用固執不許凡旬日方下其詔貞元三年遷潤州刺史兼御史大夫浙西觀察使是年六月卒

裴延齡河東人父旭和州刺史延齡乾元末爲汜水縣尉遇東都陷賊因寓居鄂州綴緝裴駟所注史記之闕遺自號小裴後華州刺史董晉辟爲防禦判官黜陟使薦其能調授太常博士盧杞爲相擢爲膳部員外郎集賢院直學士改祠部郎中崔造作相改易度支之務令延齡知東都度支院及韓滉領度支召赴京守本官延齡不待詔命遽入集賢院視事宰相延賞惡其輕率出爲昭應令與京兆尹鄭叔則論辨是非攻訐叔則之短時李泌爲相厚於叔則中丞竇叅恃恩寵惡泌而佑延齡叔則坐貶爲宋州刺史延齡改著作郎竇叅尋

作相用爲太府少卿轉司農少卿貞元八年班宏卒以延齡守本官權領度支自揣不通殖貨之務乃多設鈎距召度支老吏與謀以求恩顧乃奏云天下每年出入錢物新陳相因常不減六七千萬貫唯有一庫差舛散失莫可知之請於左藏庫中分置別庫欠負耗賸等庫及季庫月給納諸色錢物上皆從之且欲多張名目以惑上聽其實於錢物更無增加唯虛費簿書人吏耳其年遷戶部侍郎判度支奏請令京兆府以兩稅青苗錢市草百萬圍送苑中宰相陸贄趙憬議以爲若市送百萬圍草即一府百姓自冬歷夏般載不了百役供應須悉停罷又妨奪農務請令府縣量市三二萬圍各貯側近處他時要即支用京西有汙池卑濕處時有蘆葦生焉亦不過數畝延齡乃奏云廐馬冬月合在槽檻秣飼夏中即須牧放臣近尋訪是長安咸陽兩縣界有陂池數百頃請以爲內廐牧馬之地且去京城十數里與苑廐中無別上初信之言於宰相對曰恐必無此上乃差官閱視事皆虛妄延齡既慙且怒又誣奏李充爲百姓妄請積年和市物

價特勅令折填謂之底折錢嘗因奏對請積年錢帛以實帑藏上曰若爲可得錢物延齡奏曰開元天寶中天下戶僅千萬百司公務殷繁官貲尚或有闕自兵興已來戶口減耗太半今一官可兼領數司伏請自今已後內外百司官闕未須補置收其闕官祿俸以實帑藏後因對事上謂延齡曰朕所居浴堂院殿一枋以年多之故似有損蠹欲換之未能對曰宗廟事至重殿枋事至輕況陛下自有本分錢物用之不竭上驚曰本分錢何也對曰此是經義證據愚儒常材不能知陛下正合問臣唯臣知之準禮經天下賦稅當爲三分一分充乾豆一分充賓客一分充君之庖厨乾豆者供宗廟也今陛下奉宗廟雖至敬至嚴至豐至厚亦不能一分財物也只如鴻臚禮賓諸國蕃客至於迴紇馬價用一分錢物尚有贏羨甚多況陛下御膳宮厨皆極簡儉所用外分賜百官充俸料殮錢等猶未能盡據此而言庖厨者之餘其數尚多皆陛下本分也用修數十殿亦不合疑慮何況一枋上曰經義如此人揔不曾言之領之而已又因計料造神龍

寺須長五十尺松木延齡奏曰臣近於同州檢得一谷木可數千條皆長八十尺上曰人言開元天寶中側近求覓長五六十尺木尚未易須於嵐勝州採市如今何爲近處便有此木延齡奏曰臣聞賢材珍寶異物皆在處常有但遇聖君即出見今此木生關輔蓋爲聖君豈開元天寶合得有也時陸贄秉政上素所禮重母於延英極論其誕妄不可令掌財賦德宗以爲排擯待延齡益厚贄上書疏其失曰前歲秋首班宏喪亡特詔延齡繼司邦賦數日之內遽銜功能奏稱勾獲隱欺計錢二十萬貫請貯別庫以爲羨餘供御所須永無匱乏陛下欣然信納因謂委任得人旣賴盈餘之財稍弘心意之欲興作浸廣宣索漸多延齡務實前言且希睿旨不敢告闕不敢辭難勾獲是虛言無以應命供辦皆承嚴約苟在及期遂乃搜求市鄽豪奪入獻追捕夫匠迫脅就功以勒索爲名而不酬其直以和雇爲稱而不償其傭都城之中列肆爲之晝閉興役之所百工比於幽囚聚詛連郡遮訴盈路持綱者莫敢致詰巡察者莫敢爲言時有訐而言之翻

謂黨邪醜直天子轂下囂聲沸騰四方觀瞻何所取則傷心于上歛怨于人欺天陷君遠近危懼此其罪之大者也摠制邦用度支是司出納貨財太府攸職凡是太府出納皆稟度支文符太府依符以奉行度支憑案以勘覆互相關鍵用絕姦欺其出納之數則每旬申聞見在之數則每月計奏皆經度支勾覆又有御史監臨旬旬相承月月相繼明若指掌端如貫珠財貨多少無容隱漏延齡務行邪諂公肆誣欺遂奏云左藏庫司多有失落近因檢閱使置簿書乃於糞土之中收得十三萬兩其匹段雜貨又百萬有餘皆是文帳脫遺並同已棄之物今所收獲即是羨餘悉合移入雜庫以供別勅支用者其時特宣進旨並依所奏施行太府卿韋少華抗疏上陳殊不引伏確稱每月申奏皆是在數中請令推尋足驗奸詐兩司既有論執理須詳辨是非陛下縱其妄欺不加按問以在庫之物爲收獲之功以常賦之財爲羨餘之廢罔上無畏示人不懲此又罪之大者也國家府庫出納有常延齡猾售奸詭譎求媚遂於左藏之內分建六庫之

名意在別貯贏餘以奉人主私欲曾不知王者之體天下爲家國不足則取之於人人則資之於國在國爲官物在人爲私財何謂贏餘須別收貯是必巧詐以變移官物暴法以刻削私財捨此二途其將安取陛下方務崇信不加檢裁姑務保持曾無詰責延齡謂能蔽惑不復懼思奸威旣沮於四方儉態復行於內府由是蹂躪官屬傾倒貨財移東就西便爲課績取此適彼遂號羨餘愚弄朝廷有同兒戲夫理天下者以義爲本以利爲末以人爲本以財爲末本盛則其末自舉末大則其本必傾自古及今德義立而利用不豐人庶安而財貨不給因以喪邦失位者未之有也故曰不患寡而患不均不患貧而患不安有德必有人有人必有土有土必有財百姓足君孰與不足蓋謂此也自古及今德義不立而利用克宣人庶不安而財貨可保因以興邦固位者未之有也故曰財散則人聚財聚則人散與其有聚歛之臣寧有盜臣無今侵削兆人爲天子取怨于下也且陛下初膺寶曆志剪羣兇師旅繁興徵求寔廣權筭侵剥下無聊生是以

涇原叛徒乘人怨咨白晝犯關都邑毗庶恬然不驚反與賊衆相從
比肩而入宮殿雖蚩蚩之性靡所不爲然亦由德澤未浹而暴令驅
之以至於是也于時內府之積尚如丘山竟資兇渠以餌貪卒此則
陛下躬覲之矣是乃失人而聚貨夫何利之有焉車駕旣幸奉天逆
此旋肆圍逼一壘之內萬乘所屯窘如涸流庶物空匱嘗欲發一健
步出覘賊軍其人懇以苦寒爲辭跪奏乞一襦袴陛下爲之求覓不
致竟閔默而遺之又嘗宮壺之中服用有闕聖旨方以戎事爲急不
忍重煩於人乃剝親王飾帶之金賣以給直是時行從將吏赴難師
徒倉黃奔馳咸未冬服漸屬凝沍且無薪蒸饑凍內攻矢石外迫晝
則荷戈奮迅夜則映堞呻吟凌風颺冒霜雪踰四旬而衆無攜貳卒
能走強賊全危城者陛下豈有嚴刑重賞使之然耶唯以不厚其身
不藏其貨與衆庶同其憂患與士伍共其有無乃能使人捐軀命而
扞寇讐餒之不離凍之不憾臨危而不易其守見死而不去其君所
謂聖人感人心而天下和平此効也及乎重圍旣解諸路稍通賦稅

漸臻貢獻繼至乃於行宮外廡之下別置瓊林大盈之司未賞功勞
遽私賄玩甚沮惟新之望頗斃死義之心於是輿誦興譏而軍士始
怨矣財聚人散不其然乎旋屬蠹賊內興翠華南狩奉天所積財貨
悉復殲於亂軍既遷岷梁日不暇給獨憑大順遂復皇都是知天子
者以得人爲資以蓄義爲富人苟歸附何患蔑資義苟修崇何憂不
富豈在貯之內府方爲已有哉故藏於天下者天子之富也藏於境
內者諸侯之富也藏於困倉篋櫝者農夫商賈之富也奈何以天子
之貴海內之富而猥行諸侯之棄德守農商之鄙業哉陛下若謂厚
取可以恢武功則建中之取旣無成矣若謂多積可以爲已有則建
中之積又不在矣若謂徇欲不足傷理化則建中之失傷已甚矣若謂
歛怨不足致危亡則建中之亂危亦至矣然而遽能靖滔天之禍成
中興之功者良以陛下有側身修勵之志有罪已悔懼之辭罷息誅
求敦尚節儉渙發大號與人更新故靈祗感陛下之誠臣庶感陛下
之意釋憾迴慮化危爲安陛下亦當爲宗廟社稷建不拔之永圖爲

子孫黎元立可久之休業懲前事徇欲之失復日新盛德之言豈宜更縱儉邪復行剋暴事之追悔其可再乎臣又竊慮陛下納彼盜言墮其奸計以爲搏噬拏攫怨集有司積聚豐盈利歸君上是又大謬所宜慎思夫人主昏明繫於所任咎繇變弊之道長而虞舜享濬哲之名皇甫聚樸之嬖行而周厲嬰顛覆之禍自古何嘗有小人柄用而災患不及邦國者乎譬猶操兵以刃人天下不委罪於兵而委罪於所操之主畜蠱以殛物天下不歸咎於蠱而歸咎於所畜之家理有必然不可不察臣伏慮陛下以延齡之進獨出宸衷延齡之言多順聖旨今若以罪寘辟則似爲衆所擠故欲保持用彰堅斷若然陛下與人終始之意則美矣其於改過勿吝去邪勿疑之道或未盡善今希旨自默浸以成風獎之使言猶懼不旣若又阻抑誰當貢誠或恐未亮斯言請以一事爲證只如延齡兇妄流布寰區上自公卿近臣下迨輿臺賤品喧喧談議億萬爲徒能以上言其有幾陛下誠令親信博採輿詞叅較比來所聞足鑒人間情僞臣以卑鄙位當台

衡旣極崇高又承渥澤豈不知觀時附會足保舊恩隨衆沉浮免貽厚責謝病黜退獲知幾之名黨奸苟容無見嫉之患何急自苦獨當豺狼上違歡情下餌讒口良以內顧庸昧一無所堪夙蒙眷知唯以誠直綢繆惟戾一紀于茲聖慈旣以此見容愚臣亦以此自負從陛下歷播遷之危覩陛下致興復之難至今追思猶爲心悸所以畏覆車而駭慮懼燬室而悲鳴蓋情激於衷雖欲罷而不能自默因事陳請雖已頻煩天聽上高未垂諒察輒申悃欵以極愚誠憂深故語煩意懇故詞切以微臣自固之謀則過於陛下慮患之計則忠糜軀奉君所不敢避沽名銜直亦不忍爲願迴睿聰爲國熟慮社稷是賴豈唯微臣書奏德宗不悅待延齡益厚時鹽鐵轉運使張滂京兆尹李充司農卿李鈺以事相關皆證延齡矯妄德宗罷陸贄知政事爲太子賓客滂充鈺悉罷職左遷十一年春暮上數畋于苑中時久旱人情憂惴延齡遽上疏曰陸贄李充等失權心懷怨望今專大言於衆曰天下炎旱人庶流亡度支多欠闕諸軍糧草以激怒群情後數日

上又幸苑中適會神策軍人訴度支欠厩馬芻草上思延齡言即時
迴駕下詔斥逐贄充滂銛等朝廷中外惴恐延齡方謀害在朝正直
之士會諫議大夫陽城等伏閣切諫事遂且止贄充等雖已貶黜延
齡憾之未已乃掩捕李充腹心吏張忠捶掠楚痛今爲之詞云前後
隱沒官錢五十餘萬貫米麥稱是其錢物多結託權勢充妻常於犢
車中將金寶繒帛遺陸贄妻忠不勝楚毒並依延齡教抑之辭具於
款占忠妻母於光順門投匭訴冤詔御史臺推問一宿得其實狀事
皆虛乃釋忠延齡又奏京兆府妄破用錢穀請令比部勾覆以比部
郎中崔元嘗爲陸贄所黜故也及崔元勾覆錢穀又無交涉延齡既
銳意以苛刻剥下附上爲功每奏對際皆恣騁詭怪虛妄他人莫敢
言者延齡言之不疑亦人之所未嘗聞德宗頗知其誕妄但以其敢
言無隱且欲訪聞外事故斷意用之延齡恃之謂必得宰相尤好慢
罵毀詆朝臣班行爲之側目及卧病載度支官物置於私家亦無敢
言者貞元十二年卒時年六十九延齡死中外相賀唯德宗悼惜不

已冊贈太子少保

韋渠牟京兆萬年人六代祖範西魏陽太守後周封鄆城公渠牟少
惠悟涉覽經史初爲道士復爲僧興元中韓滉鎮浙西奏授試秘書
郎累轉四門博士貞元十二年四月德宗誕日御麟德殿召給事中
徐岱兵部郎中趙需禮部郎中許孟容與渠牟及道士萬叅成沙門
譚延等十二人講論儒道釋三教渠牟枝詞游說捷口水注上謂其
講釋有素聽之意動數日轉秘書郎奏詩七十韻旬日遷右補闕內
供奉僚列初不有之在延英旣對宰相多使中貴人召渠牟於官次
同輩始注目矣歲終遷右諫議大夫時延英對秉政賦之臣晝漏率
下二三刻爲常渠牟奏事率漏下五六刻上笑語款狎往往外聞渠
牟形神佻躁無士君子器志向不根道德衆雅知不能以正道開悟
上意陸贄免相後上躬親庶政不復委成宰相廟堂備員行文書而
已除守宰御史皆帝自選擇然居深宮所狎而取信者裴延齡李齊
運王紹李實韋執誼洎渠牟皆權傾相府延齡李實奸欺多端甚傷

國體紹無所發明而渠牟名素輕頗張恩勢以招趨嚮者門庭填委
茅山處士崔羊徵至闕下鄭隨自山人再至補闕馮伉自醴泉令爲
給事中皇太子侍讀皆渠牟延薦之上旣偏有所聽浮薄率皆本銜
進不復藏器蘊德皆奔馳請謁刳蹄甘辭以附渠牟居無何遷太府
卿賜金紫又轉太常卿貞元十七年卒時年五十三贈刑部尚書仍
謚曰忠

李齊運者將王暉之孫也解褐寧王府東閣祭酒七遷至監察御史
江淮都統李岍辟爲幕府累轉工部郎中爲長安縣令職事修理歷
京兆少尹陝府長史建中末改河中尹晉絳慈隰觀察使時李懷光
自山東卷甲奔難晝夜倍道比至河中力疲休兵三日齊運傾力犒
設軍人皆悅懷光旣反驅兵還保河中齊運不能敵棄城而走除爲
京兆尹兼御史大夫時賊據京城李晟軍東渭橋齊運擾攘之中徵
募工役版築城壘飛芻輓粟以應晟收復之際頗有力焉貞元中蝗
旱方熾齊運無政術乃以韓洄代之改宗正卿兼御史大夫閑廐官

苑使改檢校禮部尚書兼殿中監尋正拜禮部尚書兼殿中監使如故其後十餘歲宰臣內殿對後齊運常次進貢其計慮以決羣議齊運無學術不知大體但其言取信而已薦李錡爲浙西觀察使受賂數十萬計舉李詞爲湖州刺史旣而邑人告其賊犯上以齊運故不問而遣之齊運被疾歲餘不能朝請朝廷除授往往降中人就宅咨決末以妾衛氏爲正室身爲禮部尚書冕服以行其禮人士嗤誚貞元十二年卒時年七十二贈尚書左僕射

李實者道王元慶玄孫以蔭入仕六轉至潭州司馬洪州節度使嗣曹王臯辟爲判官遷蘄州刺史臯爲山南東道節度使復用爲節度判官檢校太子賓客員外郎臯卒新帥未至實知留後刻薄軍士衣食軍士怨叛謀殺之實夜縋城而出歸詣京師用爲司農少卿加檢校工部尚書司農卿貞元十九年爲京兆尹卿及兼官如故尋封嗣道王自爲尹京恃寵強愎不顧文法人皆側目二十年春夏旱關中大歉實爲政猛暴方務聚歛進奉以固恩顧百姓所訴一不介意因

入對德宗問人疾苦實奏曰今年雖旱穀田甚好由是租稅皆不免人窮無告乃徹屋瓦木賣麥苗以供賦歛優人成輔端因戲作語爲秦民艱苦之狀云秦地城池二百年何期如此賤田園一頃麥苗碩伍米三間堂屋二千錢凡如此語有數十篇實聞之怒言輔端誹謗國政德宗遽令決殺當時言者曰瞽誦箴諫取其詆諧以託諷諫優伶舊事也設謗木採芻蕘本欲達下情存諷議輔端不可加罪德宗亦深悔京師無不切齒以怒實故事府官避臺官實常遇侍御史王播于道實不肯避導從如常播詰其從者實怒奏播爲三原令謝之日庭詬之陵轢公卿百執事隨其喜怒誣奏遷逐者相繼朝士畏而惡之又誣奏萬年令李衆貶虔州司馬奏虞部員外郎房啓代衆昇黜如其意怙勢之色瞽然在眉睫間故事吏部將奏科目奧密朝官不通書問而實身詣選曹迫趙宗儒且以勢恐之前歲權德輿爲禮部侍郎實託私薦士不能如意後遂大錄二十人迫德輿曰可依此第之不爾必出外官悔無及也德輿雖不從然頗懼其誣奏二十一

年有詔蠲畿內逋租實違詔徵之百姓大困官吏多遭笞罰剝割括
斂聚錢三十萬貫胥吏無犯者即按之有乞丐絲髮固死無者且曰
死亦不屈亦杖殺之京師貴賤同苦其暴虐順宗在諒闇逾月實斃
人於府者十數遂議逐之乃貶通州長史制出市人皆袖瓦石投其
首實知之由月營門自苑西出人人相賀後遇赦量移虢州在道卒
韋執誼者京兆人父浼官卑執誼幼聰俊有才進士擢第應制策高
等拜右拾遺召入翰林爲學士年纔二十餘德宗尤寵異相與唱和
歌詩與裴延齡韋渠牟等出入禁中略備顧問德宗載誕日皇太子
獻佛像德宗命執誼爲畫像贊上令太子賜執誼縑帛以酬之執誼
至東宮謝太子卒然無以藉言太子因曰學士知王叔文乎彼偉才
也執誼因是與叔文交甚密俄丁母憂服闋起爲南宮郎德宗時召
入禁中初貞元十九年補闕張正一因上書言事得召見王仲舒韋
成季劉伯芻裴蒞常仲孺呂洞等以嘗同官相善以正一得召見偕
往賀之或告執誼曰正一等上疏論君與王叔文朋黨事執誼信然

之因召對奏曰韋成季等朋聚覬望德宗令金吾伺之得其相過從飲食數度於是盡逐成季等六七人當時莫測其由及順宗即位久疾不任朝政王叔文用事乃用執誼爲宰相乃自朝議郎吏部郎中騎都尉賜緋魚袋授尚書左丞同平章事仍賜金紫叔文欲專國政故令執誼爲宰相於外已自專於內執誼旣爲叔文引用不敢負情然迫於公議時時立異密令人謝叔文曰不敢負約爲異欲共成國家之事故也叔文詬怒遂成仇怨執誼旣因之得位亦欲矛盾掩其迹及憲宗受內禪王伾王叔文徒黨並逐尚以執誼是宰相杜黃裳之壻故數月後貶崖州司戶初執誼自卑官常忌諱不欲人言嶺南州縣名爲郎官時嘗與同舍諸職方觀圖每至嶺南州執誼遽命去之閉目不視及拜相還所坐堂見北壁有圖不就省七八日試觀之乃崖州圖也以爲不祥甚惡之不敢出口及坐叔文之貶果往崖州卒於貶所

王叔文者越州山陰人也以碁待詔粗知書好言理道德宗令直東

宮太子嘗與侍讀論政道因言宮市之弊太子曰寡人見上當極言之諸生稱贊其美叔文獨無言罷坐太子謂叔文曰向論宮市君獨無言何也叔文曰皇太子之事上也視膳問安之外不合輒預外事陛下在位歲久如小人離間謂殿下收取人情則安能自解太子謝之曰苟無先生安得聞此言由是重之宮中之事倚之裁決每對太子言則曰某可爲相某可爲將幸異日用之密結當代知名之士而欲僥倖速進者與韋執誼陸質呂溫李景儉韓皋韓泰陳諫柳宗元劉禹錫等十數人定爲死交而凌準程异又因其黨以進藩鎮侯伯亦有陰行賂遺請交者德宗崩已宣遺詔時上寢疾久不復關庶政深居施簾帷闔官李忠言美人牛昭容侍左右百官上議自帷中可其奏王伾常諭上屬意叔文宮中諸黃門稍稍知之其日召自右銀臺門居于翰林爲學士叔文與吏部郎中韋執誼相善請用爲宰相叔文因王伾伾因李忠言忠言因牛昭容轉相結構事下翰林叔文定可否宣于中書俾執誼承奏於外以韓泰柳宗元劉禹錫陳諫凌

準韓翬唱和曰管曰葛曰伊曰周凡其黨憫然自得謂天下無人叔文賦時每言錢穀爲國大本將可以盈縮兵賦可操柄市士叔文初入翰林自蘇州司功爲起居郎俄兼充度支鹽鐵副使以杜佑領使其實成於叔文數月轉尚書戶部侍郎領使學士如故內官俱文珍惡其弄權乃削去學士之職制出叔文大駭謂人曰叔文須時至此商量公事若不帶此職無由入內王伾爲之論請乃許三五日一入翰林竟削內職叔文始入內廷陰構密命機形不見因騰口善惡進退之人未窺其本信爲奇才及司兩使利柄齒于外朝愚智同口城狐山鬼必夜號窟居以禍福人亦神而畏之一旦晝出路馳無能必矣叔文在省署不復舉其職事引其黨與竊語謀奪內官兵柄乃以故將范希朝統京西北諸鎮行營兵馬使韓泰副之初中人尚未悟會邊上諸將各以狀辭中尉且言方屬希朝中人始悟兵柄爲叔文所奪中尉乃止諸鎮無以兵馬入希朝韓泰已至奉天諸將不至乃還無幾叔文母死前一日叔文置酒饌於翰林院宴諸學士及內官

李忠言俱文珍劉光奇等中飲叔文白諸人曰叔文母疾病比來盡心戮力爲國家事不避好惡難易者欲以報聖人之重知也若一去此職百謗斯至誰肯助叔文一言者望諸君開懷見察又曰羊士謬非毀叔文欲杖殺之而韋執誼儒而不遂叔文生平不識劉闢乃以韋臯意求領三川闢排門相干欲執叔文手豈非凶人耶叔文已令掃木場將斬之韋執誼苦執不可每念失此兩賊令人不快又自陳判度支已來興利除害以爲已功俱文珍隨語折之叔文無以對叔文未欲立皇太子順宗旣久疾未平羣臣中外請立太子旣而詔下立廣陵王爲太子天下皆悅叔文獨有憂色而不敢言其事但吟杜甫題諸葛亮祠堂詩末句云出師未捷身先死長使英雄淚滿襟因獻欵泣下人皆竊咲之皇太子監國貶爲渝州司戶明年誅之王伾杭州人始爲翰林侍書待詔累遷至正議大夫殿中丞皇太子侍書順宗即位遷左散騎常侍依前翰林待詔伾闖茸不如叔文唯招賄賂無大志息寢陋吳語素爲太子之所褻狎而叔文頗任氣自許粗知

書好言事順宗稍敬之不得如伾出入無間叔文入止翰林而伾入至柿林院見李忠言牛昭容等然各有所主伾主往來傳受王叔文主決斷韋執誼爲文誥劉禹錫陳諫韓暉韓泰柳宗元房啓凌準等謀議唱和採聽外事而伾與叔文及諸朋黨之門車馬填湊而伾門尤盛珍玩賂遺歲時不絕室中爲無門大櫃唯開一竅足以受物以藏金寶其妻或寢臥於上與叔文同貶開州司馬王叔文最所重者李景儉呂溫叔文用事時景儉居喪於東都呂溫使吐蕃留半歲叔文敗方歸陸質爲皇太子侍讀尋卒伾叔文旣逐詔貶其黨韓暉饒州司馬韓泰虔州司馬陳諫台州司馬柳宗元永州司馬劉禹錫朗州司馬凌準連州司馬程异郴州司馬韋執誼崖州司馬韓暉宰相滉之族子有俊才依附韋執誼累遷尚書司封郎中叔文敗貶池州刺史尋改饒州司馬量移汀州刺史又轉永州卒陳諫至叔文敗已出爲河中少尹自台州司馬量移封州刺史轉通州卒凌準貞元二十年自浙東觀察判官侍御史召入王叔文與準有舊引用爲翰林

學士轉負外郎坐叔文貶連州準有史學尚古文撰邠志二卷韓泰貞元中累遷至戶部郎中王叔文用爲范希朝神策行營節度行軍司馬泰最有籌畫能決陰事深爲伾叔文之所重坐貶自虔州司馬量移漳州刺史遷郴州柳宗元劉禹錫自有傳

程昇京兆長安人嘗侍父疾鄉里以孝悌稱明經及第釋褐揚州海陵主簿登開元禮科授華州鄭縣尉精於吏職剖判無滯杜刺同州帥河中皆從爲賓佐貞元末擢授監察御史遷虞部員外郎充鹽鐵轉運揚子院留後時王叔文用事由逕放利者皆附之昇亦被引用叔文敗坐貶岳州刺史改柳州司馬元和初鹽鐵使李巽薦昇曉達錢穀請棄瑕錄用擢爲侍御史復爲揚子留後累檢校兵部郎中淮南等伍道兩稅使昇自悔前非厲已竭節江淮錢穀之弊多所鏟革入爲太府少卿太卿轉衛尉卿兼御史中丞充鹽鐵轉運副使時淮西用兵國用不足昇使江表以調征賦且諷有土者以饒羨入貢至則不剝下不浚財經費以贏人頗便之由是專領鹽鐵轉運使兼

御史大夫三年九月轉工部侍郎同中書門下平章事領使如故議者以异起錢穀吏一旦位冠百寮人情大爲不可异自知叨據以謙遜自牧月餘日不敢知印秉筆异知西北邊軍政不理建議置巡邊使上問誰可使者异請自行議未決無疾而卒元和十四年四月也贈左僕射謚曰恭异性廉約歿官第家無餘財人士多之

皇甫鏐安定朝那人祖鄰幾汝州刺史父愉常州刺史鏐貞元初登進士第登賢良文學制科授監察御史丁母憂免喪坐居喪時薄游除詹事府司直轉吏部員外郎判南曹凡三年頗鈐制奸吏改吏部郎中三遷司農卿兼御史中丞賜金紫判度支俄拜戶部侍郎時方討淮西切於饋運鏐勾剥嚴急儲供辦集益承寵遇加兼御史大夫十三年與鹽鐵使程异同日以本官同平章事領使如故鏐雖有吏才素無公望特以聚歛媚上刻削希恩詔書旣下物情駭異至於賈販無識亦相嗤誚宰相崔群裴度以物議上聞憲宗怒而不聽度上疏乞罷知政事因論之曰臣亦昨於延英陳乞伏奉聖旨未遂愚衷

竊以上古明王聖帝致理興化雖由元首亦在股肱所以述堯舜之道則言稷契臯夔紀太宗玄宗之德則言房杜姚宋自古至今未有不任輔弼而能獨理天下者況今天下異於十年已前方驅駕文武廓清寇亂建昇平之業十已得八九然華夏安否繫於朝廷朝廷輕重在於宰相如臣驚鈍夙夜戰兢常以爲上有聖君下無賢臣不能增日月之明廣天地之德遂使每事皆勞聖心所以平賊安人費力如此實由臣輩不稱所職方期陛下博採物議旁求人望致之輔弼責之化成而乃忽取微人列於重地始則殿庭班列相與驚駭次則街衢市肆相與咲呼伏計遠近流聞與京師無異何者天子如堂宰臣如陛陛高則堂高陛卑則堂不得高矣宰臣失人則天子不得尊矣伏以陛下敷哲文明唯天所授凡所閱視洞達無遺所以比來選任宰相縱道不周物才不濟時公望所歸皆有可取況皇甫鏞自掌財賦隳事割剝以苛爲察以刻爲明自京北京西城鎮及百司并遠近州府應是仰給度支之處無不苦口切齒願食其肉猶賴臣等每加

勸誠或爲奏論庶事之中抑令通濟比者淮西諸軍糧料所破五成錢其實只與一成兩成士卒怨怒皆欲離叛臣到行營方且慰喻直其遷延不進供軍漸難俱能前行必有優當以此約定然後切勒供軍官且支九月一日兩成已上錢俱容努力方將小安不然必有潰散今舊兵悉向淄青討伐忽聞此人入相則必相與驚憂以爲更有前時之事則無告訴之憂雖侵刻不少然漏落亦多所以罷兵之後經費錢數一千三十萬貫此事猶可直以性惟狡詐言不誠實朝三暮四天下共知惟能上惑聖聰足見奸邪之極程异雖人品凡俗然心事和平處之煩劇或亦得力但昇之相位便在公卿之上實亦非宜如皇甫鏐天下之人怨入骨髓陛下今日收爲股肱列在臺鼎切恐不可伏惟圖之儻陛下納臣懇款速賜移易以副天下之望則天下幸甚伏聞李修疾病亦求入來如浙西觀察使且與亦得臣知一言出口必犯天威但使言行甘心獲戾今者臣若不退天下之人謂臣有負恩寵今退既未許言又不聽如火燒心若箭攢體臣自無惜

惜陛下今日事勢何者淮西盪定河北咸寧承宗斂手削地程權束身赴闕韓弘輿疾討賊此豈京師氣力能制其命祇是朝廷處置能服其心今繼既開中興再造區夏陛下何忍却自破除使億萬之衆離心四方諸侯解體凡百君子皆欲慟哭況陛下任臣之意豈比常人臣事陛下之心敢同衆士所以昧死重封以聞如不足觀臣當引領受責陛下引一市肆商徒與臣同列在臣亦有何損陛下實有所傷不勝憤懣惶恐之至時憲宗以世道漸平欲肆意娛樂池臺館宇稍增崇飾而昇鑄探知上旨數貢羨餘以備經構故帝獨排物議相之見裴度疏以爲朋黨竟不省覽鑄知公議不可益以巧媚自固奏減内外官俸錢以贍國用勅下給事中崔祐封還詔書其事方罷時内出積年庫物付度支估價例皆陳朽鑄盡以善價買之以給邊軍羅縠繒綵觸風斷裂隨手散壞軍士怨怒皆聚而焚之裴度奏事因言邊軍焚賜之意鑄因引其足奏曰此靴乃内庫出者臣以俸錢二千買之堅韌可以久服所言不可用皆詐也帝以爲然由是鑄益無

忌憚裴度有用兵伐叛之功。罇心嫉之。與宰相李逢吉。令狐楚。合勢擠度出鎮太原。崔羣有公望。爲搢紳所重。屢言時政之弊。罇惡之。因議憲宗尊號。乃奏曰。昨羣臣議上徽號。崔羣於陛下惜孝德兩字。憲宗怒。黜羣爲湖南觀察使。又與金吾將軍李道古。叶爲奸謀。薦引方士柳泌。僧大通言可致長生。中尉吐突承璀恩寵莫二。罇厚賂結其歡心。故及相位。穆宗在東宮。備聞罇之奸邪。及居諒闇。聽政之日。詔皇甫鑄器本。凡近性惟險狹。行靡所顧。又無可觀。雖早踐朝倫。而素乖公望。自掌邦計。屬當軍興。以剥下爲徇。公旣鼓衆怒。以矯迹爲孤立。用塞人言。洎塵台司。益蠹時政。不知經國之大體。不慮安邊之遠圖。三軍多凍餒之憂。百姓深凋瘵之弊。事皆罔蔽。言悉虛誣。遠近咸知。朝野同怨。而又恣求方士。上惑先朝。潛通奸人。罪在難捨。合加竄殛。以正刑章。俾黜遐荒。尚存寬典。又詔曰。山人柳泌。輒懷左道上惑。先朝固求牧人。貴欲疑衆。自知虛誕。仍便奔逃。僧大通。鑿方不精。藥術皆妄。旣延禍疊。俱是奸邪。邦國固有常刑。人神所宜共棄。宜付京

北府決重杖一頓處死柳泌本曰楊仁力少習鑿術言多誕妄李道古奸回巧宦與泌密謀求進言之於皇甫鏐因徵入禁中自云能致靈藥言天台山多靈草羣仙所會臣常知之而力不能致願爲天台長史因以求之起徒步爲台州刺史仍賜金紫諫官論奏曰列聖亦有好方士者亦與官號未嘗令賦政臨民憲宗曰煩一郡之力而致神仙長年臣子於君父何愛焉由是莫敢有言者裴潾以極言被黜泌到天台驅役吏民於山谷間聲言採藥鞭笞躁急歲餘一無所得懼詐發獲罪舉家入山谷浙東觀察使追捕送於京師鏐與李道古懇保證之必能可致靈藥乃待詔翰林院憲宗服泌藥日益煩躁喜怒不常內官懼非罪見戮遂爲弑逆大通自云壽一百五十載久得藥力又有田佐元者鳳翔號人自言有奇術能變瓦礫爲金白衣授號縣令初柳泌繫京兆府獄吏叱之曰何苦作此虛矯泌曰吾本無此心是李道古教我且云壽四百歲府吏防虞周密恐其隱化及解衣就誅一無變異但炙灼之盛痕浹身而已鏐卒於貶所鏐第鏞端

士也亦進士擢第累歷宣歙鳳翔使府從事入爲殿中侍御史轉比部員外郎河南縣令都官郎中河南少尹時鑄爲宰相領度支恩寵殊異鑄惡其太盛每弟兄讌語即極言之鑄頗不悅乃求爲分司除右庶子及鑄獲罪朝廷素知鑄有先見之明不之罪徵爲國子祭酒改太子賓客秘書監開成初除太子少保分司卒年四十九鑄能文尤工詩什樂道自怡不屑世務當時名士皆與之交有集十八卷著性言十四篇

史臣曰奸邪害正自古有之如矯誕無忌妬賢傷善未有如延齡皇甫之甚也臣每讀陸丞相論延齡疏未嘗不泣下霑衿其守正効忠爲宗社大計非端士益友安能感激犯難如此異哉德宗之爲人主也忠良不用讒慝是崇乃至身播國屯幾將覆滅向獨保延齡之是不悟盧杞之非悲夫執誼叔文乘時多僻而欲幹運六合斟酌萬機劉柳諸生逐臭市利何狂妄之甚也韋武雄材寧斷剪削厲階洎逐群度而相異鑄蓋季年之妖惑也夫何言哉

唐書列傳卷第八十五
天聽匪謚吾道斯窮
贊曰貞元之風好佞惡忠齡鍾言善爲國蠹蟲裴陸獻替嫉惡如風